

II. Samuela

KA BUKE ALUA

- ¹ MAHOPE iho o ka make ana o Saula, a ua hoi hou mai o Davida mai ka luku ana i ka Amaleka, a noho iho o Davida elua la i Zikelaga;
- ² A i ke kolu o ka la, aia hoi, he kanaka i hele mai, mai ke kahua kaua, mai Saula mai, me kona kapa i haehaeia, a me ka lepo maluna o kona poo; a hiki aku la ia io Davida la, moe iho la ia ma ka honua, a hoomaikai aku la.
- ³ I aku la o Davida ia ia, Mai hea mai oe i hele mai nei? I mai la kela ia ia, Ua pakele mai nei au mai ke kahua kaua mai o ka Israela.
- ⁴ I aku la o Davida ia ia, Pehea kela mea? Ke noi aku nei au ia oe, e hai mai ia'u. I mai la kela, Ua hee aku la na kanaka mai ke kaua aku, a ua haule na kanaka he nui loa a make: ua make hoi o Saula a me kana keikikane o Ionatana.
- ⁵ I aku la o Davida i ke kanaka opioPIO nana i hai mai ia ia, Pehea kau ike ana, ua make o Saula a me Ionatana kana keiki?
- ⁶ I mai la ua kanaka opioPIO la nana i hai mai ia ia, A i ko'u hiki wale ana aku maluna o ka puu o Gileboa, aia hoi, e kalele ana o Saula maluna iho o kona ihe; a hahai ikaika mai la na halekaa a me na hoohololio mahope ona.
- ⁷ Alawa ae la ia i hope, ike mai la ia'u, a kahea mai la ia'u: i aku la au, Eia no wau.
- ⁸ Ninau mai kela ia'u, Owai oe? Olelo aku la au, He Amaleka wau.

- ⁹ I hou mai la ia ia'u, Ke noi aku nei au ia oe, e ku oe maluna iho o'u, a e pepehi mai ia'u; no ka mea, ke kau mai nei ka poniuniu maluna iho o'u, a ke koe nei ke ola okoa iloko o'u.
- ¹⁰ A ku iho la au maluna ona, a pepehi iho la ia ia; no ka mea, ua ike pono au, aole ia e ola mahope iho o kona haule ana: lawe ae la no au i ka papale alii maluna o kona poo, a me ke kupee ma kona lima, a ua halihali mai nei au ia mau mea i kuu haku.
- ¹¹ Alaila, lalau iho la o Davida i kona kapa, a haehae iho la, a pela no hoi na kanaka a pau me ia.
- ¹² Kanikau aku la lakou me ka uwe aku, a hookeai iho la lakou a hiki i ke ahiahi, no Saula a no Ionatana kana keiki, a no ka poe kanaka o Iehova, a no ka ohana a Israela; no ka mea, ua haule lakou i ka pahikaua.
- ¹³ Ninau aku la o Davida i ke kanaka opioipo nana i hai mai ia ia, Nohea oe? I mai la kela, He keiki au na kekahi malihini, he Amaleka.
- ¹⁴ I aku la o Davida ia ia, Heaha kou mea i makau ole ai i ka o aku i kou lima e pepehi i ka Iehova mea i ponia?
- ¹⁵ Kahea aku la o Davida i kekahi kanaka opioipo, i aku la, E neenee aku oe, a e lele aku maluna ona. Pepehi aku la kela ia ia, a make iho la ia.
- ¹⁶ I aku la o Davida ia ia, Maluna o kou poo iho ke koko ou: no ka mea, ua ahewa mai la kou waha iho ia oe, i ka i ana, Ua pepehi no au i ka Iehova mea i ponia.

- ¹⁷ Kanikau aku la o Davida i keia kanikau ana ia Saula a ia Ionatana kana keiki.
- ¹⁸ (Kauoha aku la hoi ia e ao i na mamo a Iuda i ke kakaka: aia hoi ua kakauia maloko o ka buke a Iasera.)
- ¹⁹ O ka nani o ka Iseraela, ua pepehiaa oia maluna o na wahi kiekie ou;
 Kai ka haule ana o ka poe ikaika?
- ²⁰ Mai hai aku ia mea ma Gata,
 Mai kala aku hoi ia ma na alanui o Asekelona;
 O hauoli na kaikamahine a ka poe Pilisetia,
 O haanui hoi na kaikamahine a ka poe okipoepoe ole ia.
- ²¹ E na puu o Gileboa, aole make hau,
 Aole hoi he ua maluna iho o oukou;
 Aole hoi na mahinaai o na hua mua:
 Ilaila kahi i hooleiia'ku ai ka palekaua o ka mea ikaika,
 Ka palekaua o Saula i poni ole ia i ka aila.
- ²² Mai ke koko ae o ka poe i make,
 A mai ka momona ae o ka poe ikaika,
 Aole i hoi ihope ke kakaka o Ionatana,
 Aole hoi i hoi nele mai ka pahikaua a Saula.
- ²³ Ua aloha no, a ua oluolu hoi o Saula a o Ionatana i ko laua ola ana,
 A i ko laua make ana, aole laua i hookaawaleia.
 Ua oi aku ko laua mama i ko na aeto,
 A me ko laua ikaika i ko na liona.
- ²⁴ E na kaikamahine o ka Iseraela, e kanikau aku oukou ia Saula,
 Nana oukou i hoaahu aku i ke kapa ula, a me na mea nani:
 Nana i hoonani i ko oukou kapa i ke gula.

- ²⁵ Kai ka haule ana o ka poe ikaika iwaena o ke kaua ana!
 E Ionatana, ua pepehiia oe maluna o na wahi kiekie ou.
- ²⁶ Ua ehaeha loa au nou, e kuu hoahanau, e Ionatana:
 He oluolu loa oe ia'u, he kupanaha kou aloha ia'u,
 E oi mai ana i ke aloha o na wahine.
- ²⁷ Kai ka haule ana o ka poe ikaika,
 A me ka pau ana o na mea kaua!

2

- ¹ MAHOPE iho o keia mea, ninau aku la o Davida ia Iehova, i aku la, E pii aku anei au i kekahikulanakauhale o ka Iuda? I mai la o Iehova ia ia, E pii oe. I aku la o Davida, Ai la ihea kahi e pii aku ai au? I mai la kela, I Heberona.
- ² Hele aku la o Davida ilaila, a me kana mau wahine elua, o Ahinoama no Iezereela, a me Abigaila, ka wahine a Nabala no Karemela.
- ³ Lawe pu aku la o Davida i na kanaka ona, ka poe i noho pu me ia, o kela kanaka keia kanaka me kona ohua: a noho iho la lakou ma na kulanakauhale o Heberona.
- ⁴ Hele mai la na kanaka o ka Iuda, a malaila lakou i poni ai ia ia i alii maluna o ka ohana a Iuda. Hai aku la hoi lakou ia Davida, i aku la, O na kanaka o Iabesa-gileada, ka poe nana i kanu ia Saula.
- ⁵ Hoouna aku la o Davida i na elele i kanaka o Iabesa-gileada, i aku la ia lakou, E alohaia mai oukou e Iehova, no ka mea, ua hana

aku oukou i keia lokomaikai i ko oukou
haku ia Saula, a ua kanu iho ia ia.

- 6** Ano hoi, e hana mai o Iehova i ka lokomaikai a
me ka oiaio ia oukou; owau no hoi e uku
aku ia oukou i keia lokomaikai, no ka oukou
hana ana i keia mea.
- 7** Nolaila hoi, e hooikaikaia ko oukou mau lima; i
nui ke aho o oukou: no ka mea, ua make ko
oukou haku o Saula, a ua poni mai ka ohana
a Iuda ia'u i alii maluna o lakou.
- 8** Aka, o Abenera ke keiki a Nera, ke alii koa no ko
Saula poe kaua, lalau aku la oia ia Iseboseta
ke keikikane a Saula, a lawe aku la ia ia i
Mahanaima.
- 9** A hoalii aku la ia ia maluna o ka Gileada, a
maluna o ka Asera, maluna hoi o ko Iez-
ereela, a maluna o ka Eperaima, a maluna
o ka Beniamina, a maluna hoi o ka Israela
a pau.
- 10** He kanaha na makahiki o Iseboseta ke keiki a
Saula, i kona wa i noho ai i alii, a elua mau
makahiki oia i nohoalii ai. Aka, hahai aku
la ka ohana a Iuda mamuli o Davida.
- 11** A o ka manawa i nohoalii ai o Davida ma
Heberona maluna o ka ohana a Iuda, ehiku
ia mau makahiki a me na malama keu eono.
- 12** Haele mai la o Abenera ke keiki a Nera me na
kanaka o Iseboseta ke keiki a Saula, mai
Mahanaima mai a Gibeona.
- 13** Hele aku la hoi o Ioaba ke keiki a Zeruia, me
na kanaka o Davida, a halawai pu ae la
lakou ma ka punawai o Gibeona; a noho iho
la lakou, o kekahi poe ma keia aoao o ka

punawai, a o kela poe ma kela aoao o ka punawai.

14 Olelo mai la o Abenera ia Ioaba, E ku ae na kanaka opinio, a e paani imua o kakou. I aku la o Ioaba, E ku ae lakou.

15 Alaila, ku ae la a hele aku la na mea he umikumamalua o ka Beniamina no Iseboseta ke keiki a Saula, a me na kanaka o Davida he umikumamalua.

16 Lalau aku la kela mea keia mea i kona hoapaio ma ke poo, a hou aku la i kona pahikaua maloko o ka aoao o kona hoapaio, a haule pu iho la lakou a pau: nolaila, ua kapai a kela wahi, Heleka-hazurima; aia no i Gibeona.

17 A he kaua nui no ia la: a ua lukuia o Abenera me na kanaka o ka Israela imua o na kanaka o Davida.

18 Ilaila na keikikane ekolu a Zeruia, o Ioaba, o Abisai, a o Asahela: a he mama na wawae o Asahela me he dia la o ka nahelehele.

19 Alualu aku la o Asahela ia Abenera: a i ka hele ana, aole ia i kapae ma ka akau, aole hoi ma ka hema, mahope o Abenera.

20 Nana ae la o Abenera mahope ona, i ae la, O Asahela anei oe? I mai la kela, Owau no.

21 I aku la o Abenera ia ia, E haliu ae oe ma kou lima akau paha, ma kou hema paha, e lalau aku i kekahi kanaka opiopio, a e lawe nou i kona kahiko ana. Aole nae i manao o Asahela e haliu ae mai ke alualu ana ia ia.

22 Olelo hou aku la o Abenera ia Asahela, E haliu ae oe mai o'u aku nei; no ke aha la au e pepehi iho ai ia oe a ka honua? Pehea la hoi

e nana pono aku ai kuu maka ia Ioaba kou kaikuaana?

- ²³ Aka, hoole aku la ia, aole e haliu ae: nolaila, hou aku la o Abenera i ke kumu o ka ihe malalo iho o ka lima o kona iwi aoao, a puka aku la ka ihe ma kona kua: hina iho la ia ilaila, a make iho la ma ia wahi: a o na mea a pau i hiki aku ma kahi i hina iho ai o Asahela a make, ku malie iho la lakou.
- ²⁴ Alualu aku la hoi o Ioaba a me Abisai ia Abenera: a napoo iho la ka la i ko lakou hiki ana aku i ka puu o Ama imua o Gia, ma ka aoao o ka waonahele o Gibeona.
- ²⁵ Hoakoakoa pu ae la na mamo a Beniamina mamuli o Abenera, a lilo ae la i hookahi poe, a ku iho la maluna pono o ka puu.
- ²⁶ Alaila, kahea mai la o Abenera ia Ioaba, i mai la, E ai mau no anei ka pahikaua? Aole anei oe e ike, he mea awaawa no ia ma ka hopena? Peheia la ka loihi, a kena aku oe i na kanaka e uhoi aku mai ke alualu ana ae i ko lakou poe hoahanau?
- ²⁷ I aku la o Ioaba, Ma ko ke Akua ola ana, ina aole oe i olelo mai, ina ua hoi aku kela kanaka keia kanaka i kakahiaka nei mai ke alualu ana aku i kona hoahanau.
- ²⁸ Alaila puhi aku la o Ioaba i ka pu, a ku malie iho la na kanaka a pau, aole i alualu hou aku ia lakou, aole hoi i kaua hou aku lakou.
- ²⁹ Haele aku la o Abenera me na kanaka ona ma kahi papu, a hele aku la ma kela aoao o Ioredane, a haele ae la ma Biterona a pau, a hiki aku i Mahanaima.

- ³⁰ Hoi hou aku la o Ioaba mai ke alualu ana ia Abenera: a hoakoakoa ae la i na kanaka a pau, ua nalo iho na kanaka o Davida he umikumamaiwa a me Asahela.
- ³¹ Aka, ua pepehi aku na kanaka o Davida i ka Beniamina a me na kanaka o Abenera, a make iho la na kanaka ekolu haneri a me kanaono.
- ³² Lawe ae la lakou ia Asahela, a kanu iho la ia ia iloko o ka hale kupapau o kona makuakane i Betelehema. Haele aku la o Ioaba me na kanaka ona ia po a pau, a hiki aku la i Heberona i ka wanaao.

3

- ¹ HE kaua loa no iwaena o ka ohana a Saula a me ka ohana a Davida; aka, mahuahua ae la ko Davida ikaika, a emi iho la ka ohana a Saula a nawaliwali.
- ² Ua hanau na keikikane na Davida ma Heberona: o Amenona kana hanau mua na Ahinoama no Iezereela;
- ³ A o kana lua, o Kileaba na Abigaila ka wahine a Nabala no Karemela: a o ke kolu, o Abesaloma ke keikikane a Maaka a ke kaikamahine a Talemai ke alii o Gesura;
- ⁴ A o ka ha, e Adoniia ke keikikaue a Hagita; a o ka lima, o Sepatia ke keikikane a Abitala:
- ⁵ A o ke ono, o Itereama na Egela ka wahine a Davida. Ua hanau keia poe na Davida ma Heberona.

- 6** A i ka wa kaua iwaena o ka ohana a Saula a me
ka ohana a Davida, hooikaika loa iho la o
Abenera no ka ohana a Saula.
- 7** A ia kekahihaiawahine a Saula, o Rizepa kona
inoa, kekahihaiakahine a Aia. I aku la
o Iseboseta ia Abenera, No ke aha la oe i
komo aku ai iloko i ka haiawahine a kuu
makuakane?
- 8** Alaila, huhu loa o Abenera i na huaolelo a Ise-
boseta, i aku la, He poo ilio no anei au nana
i lokomaikai aku i ka ohana a Saula a kou
makuakane, i kona poe hoahanau, a me
kona poe makamaka, ma ke ku ee ana i ka
Iuda i keia manawa, aole hoi au i haawi aku
ia oe maloko o ka lima o Davida, i hoahewa
mai ai oe ia'u i neia la no ua wahine nei?
- 9** Pela ke Akua e hana mai ai ia Abenera a nui aku,
ke hana ole aku au ia Davida e like me ka
Iehova i hoohiki aku ai ia ia;
- 10** E lawe i ke aupuni mai ka ohana a Saula aku,
a e kukulu i ka nohoalii o Davida maluna
o ka Israela a o ka Iuda, mai Dana a hiki
i Beeresaba.
- 11** Aole no i hiki ia ia ke pane olelo hou aku ia
Abenera; no ka mea, ua makau kela ia ia.
- 12** A hoouna mai la o Abenera i na elele io Davida
la, i mai la, Nowai anei ka aina? wahi ana, E
hookuikahi kaua, eia hoi me oe no kuu lima,
e hoohuli aku ai i ka Israela a pau i ou la.
- 13** I aku la kela, Pono; e hookuikahi no kaua:
hookahi hoi a'u mea e kanoha aku nei ia
oe, wahi ana, Aole oe e ike mai i kuu maka,
ke lawe ole mai oe mamua ia Mikala ke

kaikamahine a Saula, i kou hele ana mai e ike i kuu maka.

¹⁴ Hoouna aku la o Davida i na elele io Iseboseta la ke keiki a Saula, i aku la, E haawi mai oe i ka'u wahine ia Mikala, a'u i kuai ai na'u i na omaka o na Pilisetia he haneri.

¹⁵ Hoouna aku la o Iseboseta, a lawe ae la ia ia mai ke kane aku o Paletiela ke keiki a Laisa.

¹⁶ Hele pu mai la kana kane me ia e uwe ana mahope iho ona, a hiki i Bahurima. Alaila, i aku o Abenera ia ia, O hoi. A hoi aku la ia.

¹⁷ Kamailio aku la o Abenera me na lunakahiko o ka Israela, i aku la, Ua imi aku oukou ia Davida i na manawa mamua i alii maluna o oukou.

¹⁸ Eia no ka manawa: no ka mea, ua olelo mai o Iehova no Davida, i ka i ana mai, Ma ka lima o ka'u kauwa o Davida e hoola au i ko'u poe kanaka i ka Israela, mailoko mai o ka lima o ka poe Pilisetia, a mailoko mai hoi o ka lima o ko lakou poe enemi a pau.

¹⁹ Olelo aku la hoi o Abenera maloko o na pepeiao o ka Beniamina: hele aku la hoi o Abenera e haiaku maloko o na pepeiao o Davida ma Heberona i na mea a pau a ka Israela i makemake ai, a me na mea a pau i make-make ai ka Beniamina.

²⁰ A hiki aku la o Abenera i Heberona io Davida la, oia me na kanaka he iwakalua. Hana iho la o Davida i ahaaina na Abenera a na ka poe kanaka me ia.

²¹ I aku la o Abenera ia Davida, E ku ae au a hele aku e houluulu i ka Israela a pau i kuu haku i ke alii, i hana lakou i berita me oe,

i nohoalii hoi oe maluna o na mea a pau a kou naau e makemake nei. Hoihoi aku la o Davida ia Abenera, a hele aku la ia me ka maluhia.

- ²² Aia hoi, hele mai la na kanaka o Davida me Ioaba mai ke kaua mai, a lawe pu mai la me lakou i ka waiwai pio he nui: aole hoi o Abenera me Davida i Heberona; no ka mea, ua hoihoi kela ia ia, a ua hele aku ia me ka maluhia.
- ²³ A hiki mai la o Ioaba a me ka poe kaua a pau pu me ia, hai mai la lakou ia Ioaba, i ka i ana mai, I hele mai nei o Abenera ke keiki a Nera i ke alii, a ua hoihoi aku kela ia ia, a ua hala aku ia me ka maluhia.
- ²⁴ Alaila, hele aku la o Ioaba i ke alii, i aku la, Heaha kau i hana'i? Aia hoi, ua hele mai nei o Abenera; heaha hoi kau i hoihoi aku ai ia ia, a ua hala loa kela?
- ²⁵ Ua ike oe ia Abenera ke keiki a Nera, i hele mai nei ia e hoopunipuni ia oe, a e ike i kou hele ana aku a me kou hoi ana mai, a o ike hoi i ua mea a pau au e hana nei.
- ²⁶ A hoi mai o Ioaba iwaho, mai o Davida mai, kena aku la ia i na kanaka e kii ia Abenera, na lakou ia i hoihoi mai, mai ka punawai mai o Sira: aole hoi i ike o Davida.
- ²⁷ A hoi hou mai la o Abenera i Heberona, kono aku la o Ioaba ia ia iwaena o ka ipuka e olelo malie aku ia ia, ilaila kela i hou aku ai ia ia malalo iho o ka lima o ka iwiaoao, a make iho la ia, no ke koko o Asahela o kona kaikaina.

- 28 Mahope iho, a lohe ae la o Davida, i aku la ia,
 Imua o Iehova ua hala ole mau loa au a me
 kuu aupuni i ke koko o Abenera ke keiki a
 Nera.
- 29 E kau aku no ia maluna o ke poo o Ioaba, maluna
 hoi o ka ohana a pau o kona makuakane;
 aole hoi e nelo kekahia o ka ohana a Ioaba
 i ka mai puha, a i ka lepera paha, a i ke
 kanikookoo paha, a i ka haule paha maluna
 o ka pahikaua, a i ka ai ole paha.
- 30 Pela o Ioaba me Abisai kona kaikaina i pepehi
 ai ia Abenera; no ka mea, ua pepehi iho oia
 i ko laua kaikaina ia Asahela i ke kaua ana
 ma Gibeona.
- 31 Olelo aku la o Davida ia Ioaba a me ka poe a pau
 me ia, E haehae iho i ko oukou kapa, a e kaei
 oukou i ke kapa inoino, a e kanikau imua o
 Abenera. A o ke alii o Davida i hele mahope
 o ka manele.
- 32 Kanu iho la lakou ia Abenera ma Heberona:
 hookiekie ae la ke alii i kona leo iluna ma
 ka hale kupapau o Abenera, a uwe iho la na
 kanaka a pau.
- 33 Kanikau iho la ke alii maluna o Abenera, i aku
 la, Ua make no anei o Abenera e like me ka
 make o ka naaupo?
- 34 Aole i nakiikiiia kou mau lima, aole hoi i paa na
 wawae i ka hao; me ka haule ana o kekahia
 imua o na kanaka hewa, pela no oe i haule
 iho ai. Uwe hou iho la na kanaka a pau
 maluna ona.
- 35 A hele mai na kanaka a pau e koi aku ia Davida e
 ai i ka ai oiai ka la: hoohiki aku la Davida, i
 aku la, Pela ke Aku a e hana mai ai ia'u a nui

aku, ke hoao iho au i ka berena a i kekahi
mea e ae, a napoo ka la.

³⁶ Nana aku la na kanaka a pau, a ua oluolu lakou
ia mea: no ka mea, ma na mea a pau a ke alii
i hana'i, ua oluolu na kanaka a pau ilaila.

³⁷ No ka mea, ua ike na kanaka a pau, a me ka
Israela a pau ia la, aole no ke alii ka pepehi
ia Abenera ke keiki a Nera.

³⁸ Olelo aku la ke alii i kana poe kauwa, Aole anei
oukou i ike, he kanaka nui i haule i neia la
iwaena o ka Israela.

³⁹ Ano hoi, ua nawaliwali au i poniiia i alii; a o keia
mau kanaka na keiki a Zeruia, ua oi aku ko
laua koikoi i ko'u; e hoouku mai no nae o
Iehova i ka mea hana ino e like me koua
hewa.

4

¹ A LOHE ae la ke keiki a Saula, ua make o Abenera
ma Heberona, palupalu iho la kona mau
lima, a pihoihoi ka Israela a pau.

² Aia na kanaka elua no ke keiki a Saula, he mau
lunakoa; o Baana ka inoa o kekahi, a o
Rekaba ka inoa o kekahi; na keiki laua a Rimona
no Beerota no na mamo a Beniamina;
(no ka mea, ua helu pu ia o Beerota me ka
Beniamina;

³ Holo aku la na kanaka o Beerota i Gitaima, a
ua noho malihini lakou ilaila, a hiki i neia
manawa.)

⁴ A o Ionatana ke keiki a Saula, nana no kekahi
keikikane, ua oopa ma kona mau wawae.
Elima ona mau makahiki i ka wa i hiki

aku ai ka olelo no Saula a no Ionatana mai Iezereela aku, a kaikai aku la kona kahu ia ia, a holo aku la: a i kona wikiwiki ana e holo aku, haule iho la kela a oopa iho la. O Mepiboseta kona inoa.

- 5** Hele aku la o Rekaba a me Baana na keiki a Rimona no Beerota, a hoi mai la laua i ka hale o Iseboseta i ka manawa i wela ai ka la, a e moe ana ia ma ka moe i ke awakea.
- 6** Hele aku la laua ilaila iwaena konu o ka hale, e like me ke kii i ka hua palaoa; a hou aku la laua ia ia malalo iho o ka lima o ka iwiaoao: a pakele aku la o Rekaba a me Baana kona hoahanau.
- 7** No ka mea, i ko laua hele ana aku iloko o ka hale, e moe ana ia maluna o kona moe iloko o kona keena moe, hou aku la laua ia ia, a make ia; a oki iho la laua i kona poo, a holoholo aku la ma ka papu a ao ka po.
- 8** Lawe mai la laua i ke poo o Iseboseta io Davida la i Heberona, i mai la i ke alii, Eia ke poo o Iseboseta ke keiki a Saula, o kou enemi, nana i imi mai i kou ola. I keia la, ua hoopai mai o Iehova maluna o Saula a me kana hua, no kuu haku no ke alii.
- 9** Olelo aku la Davida ia Rekaba a me Baana kona hoahanau, na keiki a Rimona no Beerota, i aku la ia laua, Ma ko Iehova ola ana, nana i hoopakele i kuu oia i ka popilikia a pau,
- 10** A hai mai la kekahia' u, i ka i ana mai, Aia ua make o Saula, e manao ana ia he olelo maikai kana ia' u, lalau aku la au ia ia, a pepehi iho la ia ia ma Zikelaga: oia iho la

ka uku a'u i haawi aku ai ia ia no kana olelo ana:

- ¹¹ Oia aku no, a i pepehi iho na kanaka hewa i ke kanaka pono maloko o kona hale maluna o Kona moe iho; aole anei au e hoopai koke aku i kona koko ma ko olua mau lima, a e kaili aku ia olua mai ka honua aku?
- ¹² Kena aku la Davida i na kanaka opiopio ona, a pepehi aku la lakou ia laua, a oki iho la i ko laua mau lima a me na wawae, a kau aku la ia laua maluna ma ka punawai o Heberona. A lawe ae la lakou i ke poo o Iseboseta, a kanu iho la iloko o ka hale kupapau o Abenera ma Heberona.

5

- ¹ A LAILA hele mai la na ohana a pau o ka Israela io Davida la i Heberona, a olelo mai la lakou, Eia hoi, hookahi no ko kakou iwi a me ka io.
- ² I ka wa mamua no hoi, ia Saula i alii ai maluna o kakou, o oe no ka mea nana i alakai aku a i alakai mai i ka Israela; i mai la hoi o Iehova ia oe, E hanai oe i ko'u poe kanaka i ka Israela, a e lilo oe i luna no ka Israela.
- ³ Pela na lunakahiko a pau o ka Israela i hele mai ai i ke alii ma Heberona; a hoopaa iho la ke alii o Davida i berita me lakou ma Heberona imua o Iehova: a poui iho la lakou ia Davida i alii no ka Israela.
- ⁴ He kanakolu na makahiki o Davida, i kona wa i lilo ai i alii, a nohoalii iho la ia i na makahiki he kanaha.

- 5** Ehiku mau makahiki a me na malama keu eono i nohoalii iho ai oia ma Heberona maluna o ka Iuda; a ma Ierusalemia i nohoalii iho ai oia maluna o ka Israela a pau a me ka Iuda i na makahiki he kanakolu a me kumamakolu.
- 6** Hele aku la ke alii a me na kauaka ona i Ierusalemia i ka poe Iebusi, na kamaaina o ia wahi. Olelo mai la lakou ia Davida, i ka i ana mai, Ina aole oe e lawe aku i ka poe makapo a me ka poe oopa, aole no oe e komo mai ia nei: e manao ana lakou aole e komo o Davida ilaila.
- 7** Aka, hoopio ae la o Davida i ka pakaua o Ziona, oia hoi ke kulanakauhale o Davida.
- 8** I aku la Davida ia la, O na mea pepehi i ka Iebusi, e hele lakou i ke kahawai e luku i ka poe oopa a me ka poe makapo, i ka poe i inainaia e ko Davida naau; no ka mea, ua olelo na mea makapo a me na mea oopa, Aole ia e hiki maloko o ka hale.
- 9** Noho iho la o Davida iloko o ka pakaua, a kapa iho la ia wahi, O ke kulanakauhale o Davida: a kukulu iho la o Davida i na hale ma Milo mawaho a maloko.
- 10** Mahuahua ae la o Davida a nui loa, me ia pu no hoi o Iehova ke Akua o na kaua.
- 11** A o Hirama ke alii o Turo, hoouna mai la ia i na elele io Davida la, me na laau kedera, a me na kamana, a me na kalaipohaku; a hana iho la lakou i hale no Davida.
- 12** Ike pono iho la o Davida, ua hookupaa iho no o Iehova ia ia i alii maluna o ka Israela, a ua

hookiekie ae ia i kona aupuni no kona poe kanaka no ka Iseraela.

- 13 Lawe hou ae la o Davida i na haiawahine a me na wahine hoi nana no Ierusalem, ma-hope iho o kona hele ana mai mai Heberona mai: a hanau mai la na keikikane hou a me na kaikamahine hou na Davida.
- 14 Eia na inoa o ka poe i hanau nana ma Ierusalem, o Samua, o Sobaba, o Natana, a o Solomona,
- 15 O Ibehana hoi me Elisua, o Nepega a me Iapia,
- 16 O Elisama, o Eliada, a me Elipaleta.
- 17 A lohe ae la ka poe Pilisetia, ua poni iho lakou ia Davida i alii maluna o ka Iseraela; pii nui mai la na Pilisetia a pau e imi ia Davida; a lohe ae la Davida, a iho iho la ia ma ka pakaua.
- 18 Hele mai la hoi ka poe Pilisetia, a hoomoana aku la ma ke awawa o Repaima.
- 19 Ninau aku la o Davida ia Iehova, iaku la, E pii aku anei au i ka poe Pilisetia? E hoolilo mai hoi oe ia lakou i kuu lima? I mai la o Iehova ia Davida, E pii aku oe, no ka mea, e oiaio no e noolilo au i ka poe Pilisetia i kou lima.
- 20 Hele aku la o Davida i Baala-perazima, a luku aku la o Davida ia lakou malaila, i iho la ia, Ua poha aku o Iehova maluna o ko'u poe enemi, e like me ka poha ana o ka wai. Nolaila, kapaaku la ia i ka inoa o ia wahi, o Baala-perazima.
- 21 Haalele lakou i na kii o lakou ilaila, a lawe akula o Davida a me na kanaka ona ia mau mea.

- ²² Pii hou mai la ka poe Pilisetia, a hoomoana iho la ma ke awawa o Repaima.
- ²³ A ninau aku la o Davida ia Iehova, i mai la kela, Aole oe e pii pono aku; aka, e hoopuni ae oe mahope mai o lakou, i kahi e kupono ana i na laau silika.
- ²⁴ A lohe oe i ka halulu o ka hele ana ma na welau o na laau silika, alaila oe e lalelale: no ka mea, alaila e hele aku ana o Iehova imua ou e pepehi aku i na Pilisetia.
- ²⁵ Hana aku la o Davida e like me ka Iehova i kauoha mai ai ia ia; a luku aku la ia i na Pilisetia mai Geba aku a hiki aku oe i Gazeria.

6

- ¹ HOULUULU hou ae la o Davida i na kanaka i waeia a pau o ka Israela, he kanakolu tausani.
- ² Ku ae la o Davida, a hele pu aku la me na kanaka a pau me ia mai Baale o ka Iuda, e halihali mai laila mai i ka pahu o ke Akua, i ka mea i heaia aku ai ka inoa, ka inoa o Iehova sabaota, o ka Mea e noho ana mawaena o na kerubima.
- ³ Kau aku la lakou i ka pahu o ke Akua maluna o ke kaa hou, a lawe mai la ia mailoko ae o ka hale o Abinadaba ma Gibeia. Kai aku la o Uza a me Ahio na keikikane a Abinadaba i ke kaa hou.
- ⁴ Lawe mai la lakou ia mea mailoko mai o ka hale o Abinadaba ma Gibeia, e hele pu ana me ka pahu o ke Akua, a hele aku la o Ahio imua o ka pahu.

- ⁵ Hookani aku la o Davida a me ka ohana a Iseraela a pau imua o Iehova, me na mea kani o na laau o kela ano o keia ano; me na lira, na pesaleteria, na timeberela, na korineta, a me na kimebala.
- ⁶ A hiki aku la lakou i kahi hehipalaoa no Nakona, o aku la o Uza i kona lima i ka pahu o ke Akua, a paa aku la ia; no ka mea ua okupe na bipikauo.
- ⁷ Huhu mai la o Iehova ia Uza, a hahau mai la ke Akua ia ia malaila, no kona hala; a make iho la ia malaila ma ka pahu o ke Akua.
- ⁸ Ukiuki iho la o Davida i ko Iehova hahau ana aku ia Uza; a kapaaku la o Davida i ka inoa o ia wahi, o Perezuza.
- ⁹ Makau iho la o Davida ia Iehova ia la, i iho la, Pehe la e hikiaku ai ka pahu o ke Akua io'u la?
- ¹⁰ Nolaila, aole i lawe o Davida i ka pahu o Iehova io na la i ke kulanakauhale o Davida: aka, lawe ae la o Davida ia mea iloko o ka hale o Obededoma no Gata.
- ¹¹ A waiho wale ia ka pahu o Iehova ma ka hale o Obededoma no Gata i na malama ekolu, a hoopomaikai mai la o Iehova ia Obededoma a me ko ka hale ona a pau.
- ¹² Hai aku la lakou ia Davida i ke alii, i mai la, E, ua hoopomaikai o Iehova i ko ka hale o Obededoma, a me na mea a pau ia ia, no ka pahu o ke Akua. A hele aku la o Davida, a lawe mai la i ka pahu o ke Akua, mai ka hale o Obededoma mai, a iloko o ke kulanakauhale o Davida me ka olioli.

- 13 Aia, hele aku la ka poe halihali i ka pahu o Iehova i na ana eono, mohai aku la oia i na bipi a me na mea i kupalua.
- 14 Haa ikaika aku la hoi o Davida imua o Iehova; a ua kaeiia o Davida i ka epoda olona.
- 15 A halihali mai la o Davida a me ka ohana a Israela a pau i ka pahu o Iehova me ka hooho ana, a me ka hookani ana i ka pu.
- 16 A i ka hiki ana mai o ka pahu o ke Akua iloko o ke kulanakauhale o Davida, nana aku la o Mikala ke kaikamahine a Saula ma ka puka makani, a ike aku la i ke alii ia Davida e lele ana, a e haa ana imua o Iehova; hoowahawaha aku la kona naau ia ia.
- 17 Lawe mai la lakou i ka pahu o Iehova iloko, a kau iho la ia ma kona wahi, mawaena konu o ka halelewa a Davida i kukulu ai nona: a mohai aku la o Davida i na mohaikuni, a me na mohai aloha imua o Iehova.
- 18 A pau ae la ka Davida mohai ana i na mohaikuni a me na mohai hoomalu, hoomaikai aku la ia i na kanaka ma ka inoa o Iehova sabaota.
- 19 A haawi aku la ia na ka poe kanaka a pau, na ke anaina kanaka a pau o ka Israela, na na wahine a me na kane, na kela mea keia mea, i ka popo berena a me kauwahi ia, a me kekahī pai huawaina. A hoi hou aku la na kanaka a pau i ko lakou mau wahi.
- 20 Hoi hou aku la o Davida e hooaloha i ko ka hale ona. Hele mai la o Mikala ke kaikamahine a Saula e halawai me Davida, i mai la, Kai ka nani o ke alii o ka Israela i keia la, nana i wehe ae i kona kapa i keia la imua

o na maka o na kauwawahine a kona poe kanaka, e like me ka wehe hilahila ole ana o kekahi kanaka lapuwale.

- ²¹ Iaku la o Davida ia Mikala, Imua ia o Ieliova, nana au i koho mai imua o kou makuakane, imua hoi o kana ohana a pau e hoonoho ia'u i alii maluna o ko Iehova poe kanaka, maluna o ka Israela: nolaila hoi e hula au imua o Iehova.
- ²² Ama keia hope, e lilo ana au i mea i hoowahawa-haia, a i mea ino hoi imua o ko'u maka iho: a o ka poe kauwawahine au i olelo mai ai, e hoomaikaiia mai hoi au e lakou.
- ²³ Nolaila, aohe keiki a Mikala ke kaikamahine a Saula a hiki i kona la i make ai.

7

- ¹ A I ka wa i noho ai ke alii iloko o kona hale, a hoomaha mai la o Iehova ia ia mai o a o, mai kona poe enemi a pau;
- ² Iaku la ke alii ia Natana ke kaula, Eia hoi au ke noho nei iloko o ka hale kedera; aka, e noho ana ka pahu o Iehova maloko o na paku.
- ³ Iaku la o Natana i ke alii, E hele oe e hana i ka mea a pau iloko o kou naau; no ka mea, me oe pu no o Iehova.
- ⁴ A ia po iho no, hiki mai la ka olelo a Iehova io Natana la, i mai la.
- ⁵ E hele oe e hai aku i kuu kauwa ia Davida, Eia ka Iehova e olelo aku nei, E hana anei oe i hale no'u e noho ai?
- ⁶ No ka mea, aole no au i noho iloko o ka hale maoli mai ka manawa mai a'u i alakai mai nei i na

mamo a Iseraela mai Aigupita mai, a hiki i keia la; aka, ua hele no wau maloko o ka halelole, a me ka halelewa.

- 7** I ko'u hele ana a pau me na mamo a pau a Iseraela, i olelo aku anei au i kekahī ohana a Iseraela, i ka mea a'u i kauoha aku ai e hanai i ko'u poe kanaka i ka Iseraela, i ka i ana aku, Heaha ka mea e hana ole ai oukou i hale kedera no'u?
- 8** Nolaila hoi, e olelo aku oe i kuu kauwa ia Davida, Eia ka Iehova sabaota e olelo mai nei, I lawe mai no wau ia oe mai ka pahipa mai, mamuli mai hoi o ka poe hipa, i alii oe maluua o kuu poe kanaka o ka Iseraela.
- 9** Owau hoi kekahī pu me oe i kou mau wahi i hele aku ai, a ua hooki iho no wau i ou poe enemi a pau mai kou maka aku, a ua hookaulana aku au i kou inoa, e like me ka inoa o ka poe nui ma ka honua.
- 10** Na'u hoi e hoike aku i wahi no ko'u poe kanaka no ka Iseraela, a e kanu iho no au ia lakou i noho ai lakou ma ko lakou wahi iho, aole e nee hou aku lakou; aole hoi e hoino hou mai ka poe keiki na ka ino ia lakou, e like me ka manawa mamua.
- 11** A mai ka manawa mai a'u i hoonoho ai i na lunakanawai maluna o ko'u poe kanaka o ka Iseraela, a hiki i ka hoomaha ana ia oe mai kou poe enemi ae a pau. Eia hoi ka Iehova e i mai nei ia oe, Na Iehova no e hana i hale nou.
- 12** Aia pau kou mau la, a moe iho oe me ou poe kupuna, e hooku ae au i kau keiki mahope

ou, i ka mea e puka ana mailoko ae o kou
opu, a e hookupaa hoi au i kona aupuni.

¹³ Nana no e hana i hale no ko'u inoa, a e hookupaa
hoi au i ka nohoalii o kona aupuni a mau loa
aku.

¹⁴ Owau no auanei kona makuakane, a e lilo hoi
ia i keiki na'u: a i hana ino kela, na'u no e
paipai aku ia ia me ka laau ma ko ke kanaka,
a me ka hahau ana ma ko na keiki a na
kanaka.

¹⁵ Aka, aole au e lawe i ko'u aloha mai ona aku la,
me a'u i lawe aku ai ia mea mai o Saula aku,
ka mea a'u i hoolei aku ai mai ko'u alo aku.

¹⁶ A e hookupaa mau loa ia aku kau ohana a me
kou aupuni imua ou: e hookupaaia hoi kou
nohoalii a mau loa aku.

¹⁷ Ma keia mau olelo a pau, a ma keia hihio a pau
ka Natana i olelo aku ai ia Davida.

¹⁸ Alaila komo aku la o Davida ke alii iloko, a noho
iho la imua o Iehova, a olelo aku la, Owai
la hoi wau, e ka Haku e Iehova? Heaha hoi
ko'u ohana i malama mai ai oe ia'u a hiki i
neia wa?

¹⁹ He mea uuku hoi keia imua o kou maka, e
Iehova ka Haku; aka, ua olelo mai hoi oe no
ka ohana a kau kauwa a liuliu aku mahope.
Ua like anei keia me ko ke kanaka, e Iehova
ka Haku?

²⁰ Heaha ka mea hou aku e hiki ia Davida ke olelo
aku ia oe? no ka mea, ua ike pono mai oe i
kau kauwa nei, e Iehova ka Haku.

²¹ No ka pono o kau olelo, a e like me ko loko o kou
naau kau i hana mai ai i keia mau mea nui
a pau, i mea e ike ai kau kauwa.

- 22 Nolaila, e Iehova e ke Akua, he nui oe; no ka mea, aohe mea like me oe, aohe hoi Akua e ae, o oe wale no; e like me ka mea a pau a makou i lohe ai ma ko makou pepeiao.
- 23 Owai la ka lahuikanaka ma ka honua nei e like me kou poe kanaka me ka Israela, ka poe a ke Akua i kii aku ai e hoola i poe kanaka nona, i mea e kaulana ai kona inoa, a e hana aku no lakou i na mea nui a weliweli no kou aina, imua o kou poe kanaka, o ka poe au i hoola ae nou mai na lahuikanaka o Aigupita, a me ko lakou mau akua mai.
- 24 No ka mea, ua hoolilo oe nou i kou kanaka i ka Israela, i poe kanaka nou mahope mau loa aku; a o oe, e Iehova, ua lilo mai oe i Akua no lakou.
- 25 Ano hoi, e Iehova ke Akua, e hookupaa mau loa oe i ka olelo au i olelo mai ai no kau kauwa a me kana ohana, a e hana mai e like me kau olelo.
- 26 A e hoonani mau loa ia kou inoa, i ka i ana, O Iehova sabaota, oia ke Akua maluna o ka Israela: a e hookupaaia hoi ka ohana a kau kauwa a Davida imua ou.
- 27 No ka mea, ua hoike mai oe, e Iehova sabaota, ke Akua no ka Israela, iloko o ka pepeiao o kau kauwa, i ka i ana mai, E hana au i hale nou: nolaila, ua manao iho kau kauwa iloko o kona naau e pule aku i keia pule ia oe.
- 28 Ano hoi, e Iehova ka Haku, o oe no ua Akua la, a he oiaio hoi kau mau olelo; a ua olelo mua mai oe i keia lokomaikai i kau kauwa nei:
- 29 Nolaila hoi, e lealea mai oe, a e hoopomaikai mai i ka ohana a kau kauwa, i mau loa ia imua ou: no ka mea, ua olelo no oe, e

Iehova ka Haku; a ma kau hoopomaikai ana e pomaikai ai ka ohana a kau kauwa mahope mau loa aku.

8

- ¹ MAHOPE aku, pepehi aku la o Davida i na Pilisetia, a hoolilo iho la ia lakou malalo ona: a lawe ae la hoi o Davida i ke kulanakauhale alii mailoko ae o ka lima o na Pilisetia.
- ² Pepehi aku la hoi ia i ko Moaba, ana iho la ia lakou i ke kaulaana, e hoohina ana ia lakou ma ka honua: ana iho la oia ia lakou i elua kaula-ana e make ai, a me kekahiki kaula-ana okoa e ola ai. Pela i lilo ai ko Moaba i aina kauwa na Davida, a lawe mai la hoi lakou i ka waiwai hoekupu.
- ³ Pepehi aku la hoi o Davida ia Hadadezera ke keiki a Rehoba, ke alii o Zoba, ia ia i hele aku ai e hoopaa i kona palena aina ma ka muliwai o Euperate.
- ⁴ Lawe pio aku la hoi o Davida mai ona aku la i ua hoohololio hookahi tausani me na haneri ehiku, a me na tausani kanaka hele wawae he iwakalua; a oki iho la o Davida i ke olona wawae o na lio no na halekaa; aka, ua hookoe ia i hookahi haneri o na lio halekaa.
- ⁵ A i ka hele ana mai o ko Suria no Damaseko e kokua mamuli o Hadadezera ke alii o Zoba, pepehi iho la o Davida i na kanaka he iwakalua kumamalua tausani o ko Suria.
- ⁶ A hana iho la o Davida i na pakana ma Suria o Damaseko; a lilo ae la ko Suria i poe kauwa na Davida, a lawe mai la i ka waiwai

hookupu. A malama mai la o Iehova ia Davida i na wahi a pau ana i hele ai.

⁷ Hao ae la o Davida i na palekaua gula maluna o na kauwa a Hadadezera, a lawe mai la ia mau mea i Ierusaluma.

⁸ Lawe mai la hoi o Davida ke alii i ke keleawe he nui loa, mai Beta mai, a mai Berotai mai, na kulananakauhale o Hadadezera.

⁹ A lohe ae la o Toi ke alii o Hamata ua pepehi aku o Davida i ka poe kaua a pau no Hadadezera,

¹⁰ Alaila, hoouna mai la o Toi ia Iorama kana keiki io Davida la ke alii e ike ia ia, a e hoalohaloha ia ia, no ka mea, ua kaua aku oia ia Hadadezera, a ua luku aku ia ia: no ka mea, he kanaka kaua o Toi me Hadadezera; a ma kona lima na kiahā kala a me na kiahā gula a me na kiahā keleawe.

¹¹ Hoolaa aku la no o Davida ia mau mea no Iehova, me ke kala a me ke gula ana i hoolaa aku ai o na lahuikanaka a pau ana i hookauwa aku ai:

¹² O ko Suria, o ko Moaba, a o ka poe mamo a Amona, o ko Pilisetia, a o ko Ameleka, a o ka waiwai pio no Hadadezera ke keiki a Rehoba, ke alii no Zoba.

¹³ Kaulana ae la ka inoa o Davida i kona wa i hoi mai ai, mai ka pepehi ana i ko Suria ma ke wawa paakai, he umikumamawalu tausani kanaka.

¹⁴ Hana iho la hoi ia i na pakaua ma Edoma; ma Edoma a pau i hana iho ai oia i na pakaua; a lilo mai la ko Edoma a pau i kauwa na

Davida. A malama mai la o Iehova ia Davida i na wahi a pau ana i hele aku ai.

- ¹⁵ Nohoalii iho la o Davida maluna o ka Israela a pau; a hooko aku la o Davida i ke kanawai, me ka hoopono aku i na kanaka ona a pau.
- ¹⁶ A o Ioaba ke keiki a Zeruia, oia ka luna kaua; a o Iehosapata ke keiki a Ahiluda ke kakaoolelo;
- ¹⁷ A o Zadoka ke keiki a Ahituba, a me Ahimeleka ke keiki a Abiatara na kahuna; a o Seraia ke kakauolelo;
- ¹⁸ A o Benaia ke keiki a Iehoida, maluna ia o ka poe Kereti, a me ka poe Peleti; a o na keiki a Davida, he mau keiki alii lakou.

9

- ¹ I AKU la Davida, Aole anei e koe kekahi o ka ohana a Saula, i hoike aku ai au ia ia i aloha no Ionatana?
- ² Aia kekahi kauwa no ka ohana o Saula, o Ziba kona inoa: a kii aku la lakou ia ia e hele io Davida la, i aku la ke alii ia ia, O oe no o Ziba? I mai la kela, Owau no o kau kauwa.
- ³ Iaku la ke alii, Aole anei e koe kekahi o ka ohana a Saula, i hoike aku ai au i ke aloha o ke Akua ia ia? I mai la o Ziba i ke alii, Ke koe nei no kekahi keikikane a Ionatana, ua oopa na wawae ona.
- ⁴ Iaku la ke alii ia ia, Auhea la ia? I mai la o Ziba i ke alii, aia maloko o ka hale o Makira ke keiki a Amiela i Lodebara.
- ⁵ Alaila, hoouna aku la o Davida ke alii, a lawe mai la ia ia mai loko mai o ka hale o Makira ke keiki a Amiela mai Lodebara mai.

- 6** A hiki mai la Mepiboseta, ke keiki a Ionatana, ke keiki a Saula, io Davida la, kulou iho la ia ilalo kona alo, a hoomaikai aku la, I aku la o Davida, E Mepiboseta. I mai la kela, Eia kau kauwa.
- 7** I aku la o Davida ia ia, Mai makau oe: no ka mea, e oiaio no, e lokomaikai aku au ia oe no Ionatana kou makuakane, a e hoihoi aku au nou i ka aina a pau o kou kupunakane o Saula; a e ai mau oe i ka berena ma kuu papaaaina.
- 8** Kulou iho la ia, i mai la, Heaha kau kauwa, i ike mai ai oe ia'u he ilio make?
- 9** Alaila kahea aku la ke alii ia Ziba ke kauwa a Saula, i aku la ia ia, Ua haawi aku au na ke keiki a kou haku i na mea a pau o Saula a o kana ohana a pau.
- 10** E malama oe i ka aina nona, o oe me au mau keiki a me au mau kauwa; a e lawe mai hoi oe i ai na ke keiki a kou haku e ai ai: aka, o Mepiboseta ke keiki a kou haku, e ai mau ia ma ko'u papaaaina. Aia ia Ziba na keikikane he umi kumamalima, a me na kauwa he iwakalua.
- 11** Alaila olelo aku la o Ziba i ke alii, E like me ka mea a pau a ko'u haku a ke alii i kauoha mai ai i kana kauwa, pela no e hana aku ai kau kauwa. A o Mepiboseta, e ai ia ma ko'u papaaaina e like me kekahi keiki kane a ke alii.
- 12** He keikikane opio opio ka Mepiboseta, o Mika kona inoa: a o na mea a pau i noho ma

ka hale o Ziba, he mau kauwa lakou na Mepiboseta.

¹³ A noho iho la o Mepiboseta ma Ierusalema, a ai mau iho la ia ma ka papaaina o ke alii: a ua oopa kela ma kona mau wawae a elua.

10

¹ MAHOPE mai o ia mau mea, make iho la ke alii o ka poe mamo a Amona, a nohoalii iho la o Hanuna kana keiki ma kona wahī.

² Olelo iho la o Davida, E lokomaikai aku au ia Hanuna ke keiki a Nahasa, e like me kona makuakane i lokomaikai mai ai ia'u. Hoouna aku la o Davida e hooluolu aku ia ia no kona makuakane ma ka lima o na kanaka ona. A hiki aku la na kanaka o Davida ma ka aina o na maino a Amona.

³ A o na alii o na mamo a Amona, i aku la lakou ia Hanuna i ko lakou haku, Ke manao nei anei oe e hoomaikai nei o Davida i kou makuakane i kona hoouna ana mai iou la i na mea hooluolu mai? Aole anei o Davida i hoouna mai i kona mau kanaka e makaikai i ke kulanakauhale, a e hoomakakiu mai, a e hookahuli ia wahī?

⁴ Nolaila, lalau aku la o Hanuna i na kanaka o Davida, a kahi ae la i kekahi aoao o ko lakou umiumi, a okioki iho la i ko lakou kapa mawaena ma ko lakou kikala, a hookuu mai la ia lakou.

⁵ A hai aku la lakou ia mea ia Davida, alaila hoouna aku la ia e halawai me lakou, no ka mea, ua hilahila loa ua mau kanaka la: i aku la ke alii, E noho oukou i Ieriko, a ulu ae ko oukou umiumi, alaila e hoi mai.

- 6** A ike iho la na mamo a Amona, ua pilau lakou imua o Davida, kii aku la na mamo a Amona, a hoolimalima aku la i ko Suria no Beterehoba, a me ko Suria no Zoba, he iwakalua tausani na koa kaniwawae, me ka tausani hookahi o na kanaka no Maaka ke alii, a me na kanaka no Isetoba he umiku-mamalua tausani.
- 7** A lohe ae la o Davida, hoouna aku la oia ia Ioaba, a me ka pualii a pau o ka poe ikaika.
- 8** Hele mai la ka poe mamo a Amona iwaho, a hoonohonoho iho la i ke kaua ma kahi e komo ai iloko o ka puka; a ku kaawale mai la ka poe Suria no Zoba, a no Rehoba, no Isetoba, a no Maaka, ma ke kula.
- 9** A ike aku la o Ioaba i ke alo o na kana, mamua kekahih, a mahope kekahih, alaila wae iho la ia i ka poe ui a pau o ka Israela, a hoonohonoho aku la ia lakou e ku e i ka poe Suria.
- 10** A haawi aku la ia i ka poe i koe ma ka lima o Abisai kona kaikaina, i hoonohonoho aku ai oia ia lakou e ku e i ka poe mamo a Amona.
- 11** Olelo aku la ia, Ina paha e oi aku ka ikaika o ko Suria i ko'u, alaila e kokua mai oe ia'u, aka, ina paha e oi aku ka ikaika o ka poe mamo a Amona i kou, alaila au e hele aku ai e kokua ia oe.
- 12** I nui ka ikaika, a e koa hoi kakou no ko kakou lahuikanaka, a me na kulanakauhale o ko kakou Akua: e hana mai hoi o Iehova e like me ka mea e pono imua o kona mau maka.

- 13 Neenee aku la o Ioaba me na kanaka me ia e kaua aku i ko Suria, a heeaku la lakou imua ona.
- 14 A ike ae la ka poe mamo a Amona, ua heeaku la ko Suria, alaila heeaku la hoi lakou imua o Abisai, a komoaku la iloko o kekulana kauhale. A hoi hou mai la o Ioaba mai ka poe mamo a Amona mai, a hele mai la i Ierusalem.
- 15 A ike ae la ko Suria ua pepehiia lakou imua o ka Israela, hoakoakoa ae lakou i kahi hookahi.
- 16 Kiiaku la o Hadarezera, a kai mai la i ko Suria ma kela aoao o I ka muliwai; a hele mai la lakou i Helama: imua hoi o lakou o Sobaka ka lunakaua o Hadarezera.
- 17 A haiia mai ia ia Davida, hoakoakoa ae ia i ka Israela a pau, a heleaku la ma kela aoao o Ioredane, a hikiaku la i Helama: a hoonohonohoaku la ko Suria ia lakou iho eku e ia Davida, a kauaaku la lakou ia ia.
- 18 Heeaku la ko Suria imua o ka Israela, pepehi iho la o Davida i ko na halekaa ehiku haneri o ko Suria, me na tausani koa hoohololio he kanaha; a pepehiaku la hoi oia ia Sobaka ka lunakaua o lakou, a make iho la ia ilaila.
- 19 A ike ae la ka poe alii a pau o na kauwa a Hadarezera, ua pepehiia lakou imua o ka Israela, hookuikahi mai la lakou me ka Israela, a hookauwa mai la na lakou. Pela i makau ai ko Suria i ke kokua houaku i ka poe mamo a Amona.

11

- ¹ A I ka makahiki hou, i ka manawa e hele aku ai na alii [i ke kaua,] hoouna aku la o Davida ia Ioaba, a me na kauwa ana me ia, a me ka Iseraela a pau; a luku aku la lakou i ka poe mamo a Amona; a pue aku la ia Raba: aka, noho iho la o Davida ma Ierusalemia ia manawa.
- ² A i ka manawa ahiahi, ala'e la o Davida mai kona wahi moe, a holoholo ae la maluna o ka hale o ke alii: nana aku la ia mai luna ae o ka hale i kekahih wahine e auau ana: a he maikai loa ua wahine la ke nanaia'ku.
- ³ Hoouna aku la o Davida e ninau aku no ka wahine. I mai la kekahih, Aole anei keia o Bateseba ke kaikamahine a Eliama, ka wahine hoi a Uria ka Heta?
- ⁴ Hoouna aku la o Davida i na mea kii aku, a lalau aku la ia ia: a hele mai la ia iloko io na la, a moe iho la kela me ia; no ka mea, ua huikalaia oia i kona haumia ana: a hoi hou aku la ia i kona hale.
- ⁵ A hapai ae la ua wahine la, hoouna aku la a hai ia Davida, i ka i ana, Ua hapai au.
- ⁶ Hoouna aku la o Davida io Ioaba la, i aku la, E hoouna mai oe ia Uria ka Heta i o'u nei. A hoouna mai la o Ioaba ia Uria io Davida la.
- ⁷ A hiki mai la o Uria io na la, ninau aku la o Davida ia ia i ka pomaikai o Ioaba, me ka pomaikai o na kanaka, a me ka pomaikai ana o ke kaua.
- ⁸ I aku la o Davida ia Uria, e iho iho oe i kou hale, a e holoi i kou wawae. A hele aku la o Uria

iwaho o ka hale o ke alii, a ukali aku la
kekahi ai mahope ona na ke alii aku.

⁹ Aka, hiamoe iho la o Uria ma ka puka o ka hale o
ke alii me na kauwa a pau a kona haku, aole
ia i hele aku i kona hale.

¹⁰ Hai aku la lakou ia Davida, i aku la, Aole i hele
aku o Uria i kona hale. Ninau aku la o
Davida ia Uria, Aole anei oe i hele mai mai
kou hele ana? Heaha hoi kau i hele ole aku
ai i kou hale?

¹¹ I aku la o Uria ia Davida, Ke noho nei ka pahu-
berita, a o ka Israela a o ka Iuda iloko o
na halelewa; ke hoomoana la hoi kuu haku
o Ioaba me na kauwa a kuu haku mawaho
ma ke kula; e komo anei hoi au iloko o ko'u
hale e ai, a e inu, a e moe me ka'u wahine?
Ma kou ola ana, me ke ola ana hoi o kou
uhane, aole au e hana ia mea.

¹² I aku la o Davida ia Uria, E noho iho hoi oe i
keia la, a apopo e kuu aku ai au ia oe e hoi.
A noho iho la o Uria ma Ierusalema ia la, a
hiki i kekahi la ae.

¹³ Kahea aku la o Davida ia ia, a ai iho la ia a inu hoi
imua ona; hoinu iho la o Davida ia ia a ona:
a ahiahi ae la, hele aku la ia iwaho e moe ma
kona wahi moe me na kauwa o kona haku,
aoles nae ia i hele i kona hale.

¹⁴ A kakahiaka ae, kakau iho la o Davida i ka
palapala ia Ioaba, a hoouka aku la ia ma ka
lima o Uria.

¹⁵ Kakau iho la ia iloko o ka palapala, i ka i ana'ku,
E hoonoho aku oe ia Uria ma ke alo o ke
kaua ikaika, a e hoi i hope oukou mai ona
aku la, i pepehiia'i oia a make.

- 16 A i ko Ioaba nana ana aku i ke kulanakauhale,
hoonoho aku la oia ia Uria ma kahi ana i ike
ai llaila na kanaka ikaika.
- 17 Hele mai la na kanaka o ua kulanakauhale la
iwaho, a kaua mai la ia Ioaba ma: a hina iho
la kekahī poe kanaka o na kauwa a Davida,
a make iho la hoi o Uria ka Heta.
- 18 Hoouna aku la o Ioaba, a hai aku la ia Davida i
na mea a pau o ke kaua;
- 19 Kauoha aku la ia i ka elele, i aku la, A pau kau
hai ana aku i na mea o ke kaua i ke alii;
- 20 Ina paha e huhu mai ke alii, a e i mai hoi ia oe, No
ke aha la oukou i hele aku ai pela a kokoke
i ke kulanakauhale i ke kaua ana o oukou?
Aole anei oukou i ike, e pana mai lakou mai
luna mai o ka pa?
- 21 Nawai i pepehi ia Abimeleka ke keiki a Ierube-
seta? Aole anei he wahine i hoolei iho i
ka apana pohaku wili palaoa maluna ona, i
make ai oia ma Tebeza? No ke aha la oukou
i hele aku ai a kokoke i ka pa? Alaila e i aku
oe, Ua make no hoi kau kauwa o Uria o ka
Heta.
- 22 Hele aku la ka elele, hiki aku la a hai aku la ia
Davida i na mea a pau a Ioaba i hoouna aku
ai ia ia.
- 23 I aku la ka elele ia Davida, He oiaio ua lanakila
mai kela poe kanaka maluna o makou, a
hele mai la lakou iwaho io makou la ma ke
kula, a hahai aku la makou ia lakou a hiki i
ke komo ana ma ka puka.
- 24 A pana mai la ka poe pana mai luna mai o ka
pa maluna iho o kau poe kauwa, a ua make

kekahi poe kauwa a ke alii, a ua make hoi kau kauwa o Uria.

- ²⁵ Alaila i aku la o Davida i ka elele, Penei kau e olelo aku ai ia Ioaba, Mai hoino oe ia mea ma kou manao; no ka mea, i ka ai ana mai a ka pahikaua e like me keia, pela no i na mea a pau: e hooikaika ae oe i kou kaua ana i ke kulanakauhale, a e hookahuli ia wahi; a nau no e hooikaika aku ia ia.
- ²⁶ A lohe ae la ka wahine a Uria, ua make o Uria kana kane, kanikau iho la ia i kana kane.
- ²⁷ A pau ae la ke kanikau ana, kii aku la o Davida, a lawe mai la ia ia i kona hale, a lilo ae la ia i wahine nana: a hanau mai la ia i keikikane nana: aka, he ino ka mea a Davida i hana'i imua o Iehova.

12

- ¹ HOOUNA mai la o Iehova ia Natana io Davida la: hele mai la ia io na la, i mai la ia ia, Elua mau kanaka ma kekahi kulanakauhale; ua waiwai kekahi, a ua ilihune kekahi.
- ² He nui loa hoi na ohana hipa a me na ohana bipi a ke kanaka waiwai:
- ³ Aka, na ke kanaka ilihune, hookahi wale no keikihipa wahine uuku ana i kuai ai a hanai iho ai: noho pu iho la ia me ia a me na keiki ana; ai iho la ia i kana ai, a inu hoi ma kona kiaha, a moe iho la ia ma kona poli, a me he kaikamahine la ia nana.
- ⁴ A hele mai la he kanaka hele i ua kanaka waiwai la, a aua iho la ia ke lawe i ko kana ohana hipa a me kana ohana bipi e kalua na ua kanaka la i hele mai io na la; aka, kii aku la

- ia i ke keikihipa a ke kanaka ilihune, a kalua
iho la na ke kanaka i hele mai io na la.
- ⁵ Huhu loa aku la o Davida i ua kanaka la; i aku
la oia ia Natana, Ma ke ola ana o Iehova, he
oiaio no e make ke kanaka nana i hana ia
mea.
- ⁶ A e hoihoi pa-ha aku ia i ke keikihipa, no ka hana
ana ia mea, a no ka mea, aohe ona aloha.
- ⁷ I aku la o Natana ia Davida, O oe no ia kanaka:
Penei ka Iehova ke Akua no ka Israela i
olelo mai ai, Ua poniaku no au ia oe i alii
raaluna o ka Israela, a ua hoopakele hoi au
ia oe i ka lima o Saula:
- ⁸ A haawi aku la au i ka hale o kou haku nou, a
me na wahine a kou haku iloko o kou poli, a
haawi aku la hoi au i ka ohana o ka Israela
a me ka Iuda nou: a ina he uuku keia mau
mea, alaila e haawi aku hoi au nau, i kela
mau mea, a i keia mau mea.
- ⁹ Heaha hoi kau i hoowahawaha ai i ke kanawai
o Iehova, e hana i ka hewa imua o kona
maka? Ua pepehi ae oe ia Uria ka Heta me
ka pahikaua, a ua lawe oe i kana wahine i
wahine nau; a ua pepehi i ke kane me ka
pahikaua a ka poe mamo a Amona.
- ¹⁰ No ia mea hoi, aole loa e kaawale aku ka
pahikaua mai kou ohana aku; no ka mea, ua
hoowahawaha mai oe ia'u, a ua lawe oe i ka
wahine a Uria ka Heta i wahine nau.
- ¹¹ Penei ka Iehova i olelo mai ai, Eia hoi, e hoala
auanei au i ka ino ku e ia oe maloko o kou
hale, a e lawe au i kau mau wahine imua
o kou maka, a e haawi aku ia lakou na kou
hoalauna, a e moe ia me kau mau wahine
imua o keia la.

- ¹² No ka mea, ua hana malu oe i kau; aka, e hana au i keia mea imua o ka Israela a pau, a imua hoi o ka la.
- ¹³ I aku la o Davida ia Natana, Ua hana hewa wau ia Iehova. I mai la o Natana ia Davida, Ua kala aku hoi o Iehova i kou hewa; aole oe e make.
- ¹⁴ Aka, no ka mea, ma keia hana ana au, ua loaa i ka poe enemi o Iehova ke kumu e olelo hoino ai, he oiaio no e make ke keiki i hanau mai nau.
- ¹⁵ Hoi aku la o Natana i kona hale. Hahau mai la o Iehova i ke keiki a ka wahine a Uriā i hanau mai ai na Davida, a mai nui iho la ia.
- ¹⁶ Nolaila, nonoi aku la o Davida i ke Akua no ke keiki: hookeai iho la o Davida, komo aku la, a moe iho la ma ka honua a ao ka po.
- ¹⁷ Ku ae la na lunakahiko o kona hale, hele aku la io na la e hoala ia ia mai ka honua ae: aole ia i ae aku, aole hoi i ai i ka ai me lakou.
- ¹⁸ A i ka hiku o ka la, make iho la ke keiki. Makau iho la na kauwa a Davida e hai aku ia ia, ua make ke keiki; i ae la lakou, Aia i ke ola ana o ke keiki, olelo aku la kakou ia ia, aole ia i hoolohe mai i ko kakou leo: he oiaio no, e hana eha oia ia ia iho, ke hai aku kakou ia ia, ua make ke keiki.
- ¹⁹ A ike ae la o Davida i ka hamumumu a na kauwa ana, ike iho la o Davida, ua make ke keiki: nolaila i aku la o Davida i kana mau kauwa, Ua make anei ke keiki? I mai la lakou, Ua make.
- ²⁰ Alaila, ku ae la o Davida mai ka honua aku, auau iho la, a hamo iho la i ka aila, aahu iho la ia ia i ka lole hou, hele aku la i ka hale o Iehova,

a hoomana aku la. Alaila hoi mai la ia i kona hale: a kena aku la ia, a kau mai la lakou i ka ai imua ona, a ai iho la ia.

- 21 Alaila, i aku la kana mau kauwa ia ia. Heaha keia au i hana iho nei? hookeai iho la oe me ka uwe i ke keiki i kona wa e ola ana; a make iho ke keiki, ua ala ae oe a ai iho i ka ai.
- 22 I mai la kela, A e ola ana ke keiki, hookeai iho la au me ka uwe: i iho la au, Malama paha e aloha mai ke Akua ia'u i ola ke keiki.
- 23 Ano hoi, ua make ia: no ke aha hoi au e hookeai ai? E hiki anei ia'u ke hoihoi mai ia ia? Owau ke hele aku io na la, aka, aole ia e hoi hou mai io'u nei.
- 24 Hooluolu aku la o Davida ia Bateseba i kana wahine; komo aku la ia iloko io na la, a moe me ia: a hanau mai la ia i keikikane, a kapaaku la kela i kona inoa, o Solomona; a aloha mai la o Iehova ia ia.
- 25 Hoouna mai la ia i ke kaula ia Natana, a kapa mai la ia i kona inoa o Iedidia, no Iehova.
- 26 Kaua aku la o Ioaba ia Raba o na mamo a Amona, a hoopio mai la i ke kulanakauhale alii.
- 27 Hoouna mai la o Ioaba i na elele io Davida la, i mai la, E, ua kana aku no wau ia Raba, a ua hoopio iho i ke kulanakauhale wai.
- 28 Ano hoi, e hoakoakoa pu mai oe i na kanaka e koe, e kaua aku i ke kulanakauhale, a e hoopio ia wahi; o pio auanei ke kulanakauhale ia'u, a e kaheia ko'u inoa maluna ona.
- 29 Hoakoakoa pu ae la o Davida i na kanaka a pau, a hele aku la i Raba, kauaaku la ia, a hoopio iho la ia wahi.

- 30** Lawe ae la hoi ia i ka papale o ko lakou alii, mailuna o kona poo, ma ke kaupaona ana, he talena gula ia, me na pohaku makamae, a ua kauia maluna o ke poo o Davida. A lawe mai la ia i ka waiwai pio o ke kulanakauhale he nui loa.
- 31** Lawe ae la hoi oia i na kanaka maloko, a kau iho la ia lakou malalo o na pahiolo, a malalo o na mea hao oioi, a malalo hoi o na koilipi hao, a hoohele aku la hoi ia lakou mawaena o ka umu pohakuula: pela ia i hana aku ai i na kulanakauhale a pau i na mamo a Amona. A hoi aku la o Davida a me na kanaka a pau i Ierusalem.

13

- 1** A MAHOPE iho o ia mea, he kaiku wahine maikai ko Abesaloma ke keikikane a Davida, o Tamara kona inoa: aloha mai la o Amenona ke keikikane a Davida ia ia.
- 2** Pela ka pono ole ana o Amenona, a mai iho la ia no kona kaiku wahine no Tamara; no ka mea, he puupaa ia: aole i hiki pono ia Amenona ke hana aku i kekahī mea ia ia.
- 3** He hoalauna ko Amenona, o Ionadaba kona inoa, ke keiki a Simea a ko Davida kaikuaana: a he kanaka maalea loa o Ionadaba.
- 4** I aku la kela ia ia, O oe ke keiki a ke alii, heaha la kau mea e wiwi ai i kela la i keia la? Aole oe e hai mai ia'ū, ea? I mai la o Amenona ia ia, Ua aloha au ia Tamara i ke kaiku wahine o kuu kaikaina o Abesaloma.
- 5** I aku la o Ionadaba ia ia, E moe iho oe ma kou wahi moe, a e hoomaimai iho oe: a hele mai kou makuakane e ike ia oe, e i aku oe

ia ia, Ea, ke noi aku nei au ia oe, e ae mai oe e hele mai o Tamara kuu kaikuwahine e haawi mai ia i ai na'u, e hoomakaukau ia i ka ai imua o ko'u mau maka, i ike au, a ai iho hoi ma kona lima.

- 6** Moe iho la o Amenona, a hoomaimai ia ia iho: a hele mai ke alii e ike ia ia, i aku la o Amenona i ke alii, E, ke noi aku nei au ia oe, e ae mai oe e hele mai o Tamara kuu kaikuwahine, a hana iho na'u i elua wahi popo palaoa imua o kuu mau maka, i ai iho au ma kona lima.
- 7** Alaila, hoouna aku la o Davida io Tamara la ma kona wahi, iaku la, E hele oe ano i ka hale o kou kaikunane o Amenona, a e hana oe i wahi ai nana.
- 8** Hele aku la o Tamara i ka hale o kona kaikunane o Amenona, a e moe ana no ia. Lawe ae la kela i ka palaoa, kawili ae la, a hana iho la i na popo imua o kona maka, a pulehu iho la i ua mau popo la.
- 9** Lawe ae la ia i ke pa, a ninini aku la ia mau mea imua ona, aole nae ia i ai. I aku la o Amenona, E hele iwaho na kanaka a pau mai o'u aku nei; I hele aku la na kanaka a pau iwaho mai ona aku la.
- 10** I aku la o Amenona ia Tamara, E lawe mai oe i ka ai maloko o ke keena nei i ai iho au ma kou lima, Lawe ae la o Tamara i na popo palaoa ana i hana'i, a halihali mai la iloko o ke keena io Amenona la i kona kaikunane.
- 11** Aia lawe mai la ia io na la e ai ai, lalau aku la kela ia ia, iaku la ia ia, E, e moe kaua, e kuu kaikuwahine.

- 12 I mai la kela ia ia, Aole, e kuu kaikunane, mai pue wale mai oe ia'u; no ka mea, aole e pono ke hana pela iwaena o ka Israela: mai hana oe i keia mea ino.
- 13 A owau la, mahea la uanei au e huna ai i kuu hilahila? A o oe hoi, e like auanei oe me kekahia o ka poe haukae iloko o ka Israela. No ia mea ea, e olelo aku oe i ke alii; aole ia e paa ia'u mai ou aku la.
- 14 Aole nae ia i hoolohe mai i kona leo; aka, no ka oi o kona ikaika i ko ia la, pue wale aku la kela ia ia, a moe iho la me ia.
- 15 Alaila, mains aku la o Amenona ia ia me ka inaina nui loa: a ua oi aku ka inaina ana i inaina aku ai ia ia, i ke aloha ana i aloha mua aku ai ia ia. I aku la o Amenona ia ia, E ala'e, e hoi.
- 16 I mai la kela ia ia, Aohe pono; o keia hala o kou kipaku ana ia'u ua oi aku ia i kela mea au i hana iho nei ia'u: aole nae ia i hoolohe aku ia ia.
- 17 Kahea aku la ia i kana kauwa, i ka mea i lawelawe nana, i aku la, E kipaku aku oe ia ia nei iwaho mai o'u aku nei, a e hoopaa i ka puka mahope ona.
- 18 He kapa onionio maluna ona: pela no i kahikoia'i na kaikamahine puupaa a ke alii. Alaila lawe ae la kana kauwa ia ia iwaho, a hoopaa iho la i ka puka mahope ona.
- 19 Lu iho la o Tamara i ka lehuahi maluna o kona poo, haehae ae la i kona kapa onionio maluna ona, kau ae la hoi ia i kona lima maluna o kona poo, a hele aku la e uwe ana.

- 20** I aku la o Abesaloma o kona kaikunane ia ia,
 Ua moe no anei o Amenona kou kaikunane me oe? E noho malie hoi oe, e
 kuu kaikuwahine, o kou kaikunane kela, mai manao nui oe ma ia mea. A noho
 mehameha iho la o Tamara ma ka hale o Abesaloma kona kaikunane.
- 21** A i ka lohe ana o Davida ke alii ia mau mea a pau,
 huhu loa iho la ia.
- 22** Aole i olelo aku o Abesaloma ia Amenona kona
 kaikuaana i ka pono, aole hoi i ka hewa:
 no ka mea, ua inaina aku o Abesaloma ia
 Amenona, i kona pue wale ana ia Tamara i
 kona kaikuwahine.
- 23** A hala ae la na makahiki okoa elua, he aha
 ako hipa ko Abesaloma ma Baalahazora e
 kokoke ana me ko Eperaima: a kono aku la
 o Abesaloma i na keikikane a pau a ke alii e
 hele ilaila.
- 24** Hele mai la o Abesaloma i ke alii, i mai la, Aia he
 aha ako hipa o kau kauwa; ke noi aku nei au
 ia oe, e hele pu ke alii a me kana poe kauwa
 me kau kauwa.
- 25** I aku la ke alii ia Abesaloma, Aole makou a pau
 e hele, e kuu keiki, o hookaumaha makou ia
 oe. Koi mai la kela ia ia; aole nae ia I manao
 e hele, aka, hoomaikai aku la oia ia ia.
- 26** I mai la o Abesaloma, A i ole, ke noi aku nei au
 ia oe, o ae mai i kuu kaikuaana ia Amenona
 e hele pu me makou. Iaku la ke alii ia ia,
 Heaha la kana e hele pu aku ai me oe?

- ²⁷ Koiaku la o Abesaloma ia ia, a ae mai la ia e hele pu o Amenona, a o na keikikane a pau a ke alii me ia.
- ²⁸ Kauoha aku la o Abesaloma i kana poe kauwa, iaku la, E nana oukou, a olioli ka naau o Amenona i ka waina; a olelo aku hoi au ia oukou, E pepehi ia Amenona, alaila e pepehi ia ia, mai makau; aole anei au i kauoha aku? I nui ke aho, a e koa hoi.
- ²⁹ A hana aku la na kauwa a Abesaloma ia Amenona, e like me ka Abesaloma i kauoha ai: alaila ku ae la na keikikane a pau a ke alii, ae aku la kela kanaka keia kanaka maluna o kona hoki, a holo aku la.
- ³⁰ Aia ma ke alanui lakou, haiia mai ia Davida, i ka i ana, Ua pepehi iho la o Abesaloma i na keikikane a pau a ke alii, aole koe kekahio lakou.
- ³¹ Alaila, ku ae la ke alii, haehae ae la i na kapa ona, a moe iho la ma ka honua, a ku mai la na kauwa ana a pau me ka haehaeia o ko lakou kapa.
- ³² Olelo mai la o Ionadaba ko keiki a Simea a ko Davida kaikuanaa, i mai la, Mai manao oe, e kuu haku, ua pepehi lakou i ka poe kanaka opio a pau, i na keikikane a ke alii: o Amenona wale no ka i make, no ka mea, ua ohumuia keia mea ma ka waha o Abesaloma, mai ka la mai i pue wale aku ai kela i kona kaikuwahine ia Tamara.
- ³³ Nolaila hoi, mai hookaumaha kuu haku ke alii i kona naau ia mea, me ka manao ua make

na keiki a pau a ko alii: o Amenona wale no ka i make.

³⁴ Mahuka aku la o Abesaloma. A o ke kanaka opiopio e kiai ana, alawa ae la na maka ona iluna, ike aku la, aia la, he nui na kanaka e hele mai ana ma ke ala ma ka aoao o ka puu mahope ona.

³⁵ I aku la o Ionadaba i ke alii, Aia la, ke hele mai nei na keikikane a ke alii, e like me ka olelo ana a kau kauwa.

³⁶ A pau ae la ka olelo ana, hiki mai la na keikikane a ke alii, hookiekie ae la lakou i ko lakou leo, a uwe aku la: uwe nui loa iho la ke alii a me kana poe kauwa a pau.

³⁷ Mahuka aku la o Abesaloma, a hele aku la io Talemai la i ke keiki a Amihuda ke alii no Gesura. Kanikau iho la o [Davida] i kana keiki i kela la i keia la.

³⁸ Mahukaaku la o Abesaloma, a hele aku la i Gesura, noho iho la ilaila ekolu makahiki.

³⁹ Iini loa iho la o Davida ke alii e hele aku io Abesaloma la; no ka mea, ua hooluolua oia no Amenona, i kona make ana.

14

¹ IKE ae la o Ioaba ke keiki a Zeruia, ua hele aku ka naau o ke alii io Abesaloma la.

² Hoounaaku la o Ioaba i Tekoa, a lawe mai la i kekahi wahine akamai mailaila mai, iaku la ia ia, Ke noiaku nei au ia oe, e hoolike oe ia oe iho me ka mea kanikau, a e aahu oe i ke kapa makena, aole hoi e kahinu i ka aila:

e like oe me ka wahine i kanikau loa no ka
mea i make.

3 A e hele aku i ke alii, a penei e olelo aku ai. Alaila,
hai aku la o Ioaba i na huaolelo no kona
waha.

4 A i ka wa i olelo aku ai ka wahine o Tekoa i ke alii,
moe iho la ia ilalo kona alo, hoomaikai aku
la i ke alii, i aku la, E hoola mai, e ke alii.

5 I mai la ke alii ia ia, Heaha kau? Iaku la kela, He
wahinekanemake au, ua make kuu kane.

6 He mau keikikane elua a kau kauwawahine,
hakaka ae la laua ma ke kula, aohe mea hoi
nana e uwao, a hahau aku la kekah i kona
hoa, a make iho la ia.

7 Aia hoi, ua ku e mai ka ohana a pau i kau
kauwawahine; i mai lakou, E haawi mai oe
i ka mea nana i hahau i kona hoahanau, i
pepehi aku makou ia ia, no ke ola o kona
hoahanau ana i pepehi aku ai; a e hoopau
no hoi makou i ka hooilina: pela no lakou e
kinai ai i kuu lanahu ahi i koe, aole no hoi
lakou e waiho no ka'u kane i inoa, aole hoi
koena maluna o ka honua.

8 I mai la ke alii i ua wahine la, O hoi oe i kou hale,
a e kauoha aku hoi au nou.

9 Olelo aku la ka wahine o Tekoa i ke alii, E kuu
haku, e ke alii, maluna iho o'u ka hala, a
maluna hoi o ka ohana a ko'u makua: a e
hala ole ke alii a me kona nohoalil

10 I mai la ke alii, O ka mea olelo mai ia oe, e kai mai
ia ia io'u nei, aole hoi ia e hoopau hou aku ia
oe.

11 Alaila, i aku la kela, Ke noi aku nei au ia oe, e
hoomanao ke alii ia Iehova i kou Akua, i ole

e luku hou aku ka mea hoopai koko, o make ka'u keiki I mai la ke alii, Ma ko Iehova ola ana, aole o haule ka lauoho hookahi o kau keiki ma ka honua.

12 Alaila i aku la ua wahine la, Ke noi aku nei au ia oe, e ae mai oe i kau kauwawahine, e haiaku ia i hookahi huaoelo i kuu haku i ke alii. I mai la kela, E hai mai

13 I aku la ka wahine, No ke aha la hoi oe i manao ia mea ku e i ko ke Akua poe kanaka? no ka mea, ua olelo mai ke alii ia mea, me he mea hewa la, i ka hoihoi ole mai o ke alii ia nei i ka mea ana i hookuke aku ai.

14 No ka mea, he oiaio no e make kakou, a ua like me ka wai i haninii ma ka honua, aole e hiki ke ukuhi hou ia: aole no ke Akua i lawe aku i kona ola, aka, ua noonoo kela i ka mea e lilo loa ole ai ka mea ana i hookuke aku ai.

15 Nolaula hoi, i kuu hiki ana mai e olelo aku i kuu haku i ke alii ma ia mea, no ka hoomakau ana mai a na kanaka ia'u: i iho la kau kauwawahine, E olelo aku no wau i ke alii; malia paha e hana mai ke alii e like me ka noi ana aku a kana kauwawahine.

16 No ka mea, e lohe mai no ke alii, i hoopakele oia i kana kauwawahine i ka lima o ke kanaka nana e hoolei aku ia maua pu me kuu keiki iwaho o ka noho ana o ke Akua.

17 Alaila, i iho la kau kauwawahine, e lilo no ka olelo a kuu haku a ke alii i mea hoomaha: no ka mea, ua like kun haku ke alii me ka anela o ke Akua, i ka nana i ka pono a me ka hewa: nolaila, me oe pu auanei o Iehova o kou Akua.

- 18** Alaila, olelo mai la ke alii, i mai la i ua wahine la, Mai huna oe ia'u, ea, i ka mea a'u e ninau aku nei ia oe. Iaku la ka wahine, E olelo mai kuu haku ke alii ano.
- 19** I mai la ke alii, Aole anei ka lima o Ioaba pu me oe i neia mea? Olelo aku la ua wahine la, i aku la, Oiaio no, e kuu haku, e ke alii, aole e hiki i kekahi ke kapae aku ma ka akau, aole hoi ma ka hema o kekahi mea a kuu haku a ke alii i olelo mai nei: o kau kauwa o Ioaba, oia ka i kauoha mai ia'u, a hahao mai la ia mau huaolelo a pau maloko o ka waha o kau kauwawahine.
- 20** Pela i hana iho ai o loaba i mea e loaa'i keia ano o ka olelo: a ua naauao ko'u haku, e like me ka naauao o ka anela o ke Akua, ma ka ike i na mea a pau o ka honua nei.
- 21** I aku la ke alii ia Ioaba, aia hoi, ua hana iho nei au i keia mea, e kii aku oe, a e hoihoi mai i ke kanaka opiopio ia Abesaloma.
- 22** Moe iho la o Ioaba ma ka honua ilalo kona alo, kulou iho la, a hoomaikai aku la i ke alii. I aku la o Ioaba, Ke ike nei au i keia la, ua loaa ia'u ke aloha imua o kou maka, e kuu haku, e ke alii, no ka mea, ua hooko mai ke alii i ka mea a kana kauwa i noi aku ai.
- 23** Ku ae la o Ioaba, a hele aku la i Gesura, a lawe mai la ia Abesaloma i Ierusalema.
- 24** I aku la ke alii, E kipa ae ia i kona hale iho, aole ia e ike mai i kuu maka. A hoi ae la o Abesaloma i kona hale, aole i ike aku i na maka o ke alii.
- 25** A iloko o ka Israela a pau, aole he kanaka e ae i mahalo nui ia e like me Abesaloma no kona

maikai: mai ka poli wawae ona a hiki iluna
i ka piko o kona poo, aohe ona kina iki.

- 26 Aia ako ia i kona poo, (no ka mea, i ka pau ana o kela makahiki, keia makahiki, ako ae la ia i ke oho; no ko kaumaha o ke oho maluna ona, nolaila ia i ako ia mea;) kaupaona iho la ia i ke oho o kona poo, elua haneri sekela, e like me Ka ke alii hookau ana.
- 27 Ua hanau na Abesaloma ekolu keikikane, a hookahi kaikamahine, o Tamara kona inoa; he wahine maikai hoi ma kona helehelena.
- 28 Pela i noho ai o Abesaloma ma Ierusalema, elua makahiki okoa, aole hoi ia i ike aku i na maka o ke alii.
- 29 Nolaila, kena aku la o Abesaloma e kii ia loaba, e hoouna aku ia ia e hele i ke alii; aole nae ia i hele mai io na la; a hoouna hou aku la ia, o ka lua ia o ke kii ana, aole hoi ia i hele mai.
- 30 Alaila i aku la ia i kana poe kauwa, Aia ka mahinaai a loaba e kokoke ana i kuu wahi, a he bale kana ilaila; ou haele oukou e puhi i ke ahi. A puhi aku la na kauwa a Abesaloma i ua mahinaai la i ke ahi.
- 31 Alaila ku ae la o loaba, a hele mai io Abesaloma la i kona hale, i mai la ia ia, E heaha ka mea i puhi aku ai kau poe kauwa i kuu mahinaai i ke ahi.
- 32 Olelo aku la o Abesaloma ia loaba, Aia hoi, ua hoouna aku la au iou la, me ka i ana aku, E hele mai ia nei, i hoouna aku ai au ia oe i ke alii, e i aku ia ia, Heaha ka mea i hoi mai nei au mai Gesura mai? E aho no wau e noho malaila a hiki i neia wa: ano hoi, e ae mai

oe e ike aku au i na maka o ke alii; a ina he hewa iloko o'u, e pepehi mai keia ia'u.

- ³³ Alaila hele aku la o loaba i ke alii, a hai aku la ia ia: a hea mai la oia ia Abesaloma, a hele aku la ia i ke alii, a kulou iho la ia ma ka honua ilalo kona alo imua o ke alii; a honi mai la ke alii ia Abesaloma.

15

- ¹ MAHOPE iho o ia mea la, hoomakaukau ae la o Abesaloma i na hale kaa a me na lio nona, a me na kanaka he kanalima e holo imua ona.
- ² Ala ae la o Abesaloma i kakahiaka, a ku mai la ma kapa alanui ma ka ipuka: a hele aku kekahi kanaka i ke alii ia ia ka mea hakaka e hooponoponoia'i ma ke kanawai, alaila hea aku la o Abesaloma ia ia, i aku la, No ke kulanakauhale hea oe? I mai la kela, No kekahi ohana a Israela kau kauwa.
- ³ I aku la o Abesaloma, Aia, he maikai, a he pono kau mau mea; aka, aohe kanaka o ke alii nana e hooponopono i kau.
- ⁴ I aku la hoi o Abesaloma, Ina paha e hoono-hoia au he lunakanawai o ka aina, alaila o kela kanaka o keia kanaka ia ia ka mea e hookolokoloia'i, e hele mai ia io'u nei, a e hooponopono aku au nona.
- ⁵ A I ka wa i hele mai ai kekahi kanaka e uwe aloha ia ia, o aku la ia i kona lima, lalau aku la ia ia, a honi ae la.
- ⁶ Pela no i hana aku ai o Abesaloma i ka Israela a pau i hele mai i ke alii no ka hooponoponoia. A aihue ae la o Abesaloma i na naau o ka Israela.

- ⁷ Mahope iho o na makahiki hookahi kanaha, i aku la o Abesaloma i ke alii, Ke noi aku nei au ia oe, e ae mai oe e hele au i Heberona e hooko aku i kuu hoohild ana a'u i hoohiki ai ia Iehova.
- ⁸ No ka mea, hoohiki aku la au i kuu wa i noho ai ma Gesura i Suria, i aku la, Ina paha e hoihoi io aku o Iehova ia'u ma Ierusalema, alaila au e malama aku ai ia Iehova.
- ⁹ I mai la ke alii ia ia, O hele oe me ke aloha. Ku ae la ia, a hele aku la i Heberona.
- ¹⁰ Hoouna aku la o Abesaloma i na kiu iwaena o na ohana a pau o ka Israela, i aku la, A lohe oukou i ke kani ana o ka pu, alaila, e olelo oukou, E alii ana o Abesaloma ma Heberona.
- ¹¹ Hele pu aku la me Abesaloma mai Ierusalema aku elua haneri kanaka i waeia; a hele naaupo wale no lakou, aole i ike i kekahimea.
- ¹² Hoouna aku la o Abesaloma e kii ia Ahitopela no Gilo, he kakaoleso no Davida, e hele mai mai kona kulanakaauhale, mai Gilo mai, i ka wa ana i mohai aku ai. Ua ikaika no ka poe kipi; no ka mea, ua mahuahua mau mai a nui ae na kanaka me Abesaloma.
- ¹³ Hele mai la kekahimea kanaka io Davida la, i mai la, Aia mamuli o Abesaloma na naau o na kanaka o ka Israela.
- ¹⁴ I mai la o Davida i na kanaka ona a pau ma Ierusalema, E ku ae, a e holo aku kakou; no ka mea, pela wale no e pakele ai kakou mai o Abesaloma aku: e wikiwiki ka hele aku, o hiki koke mai oia io kakou nei, a hooili

mai oia i ka ino maluna o kakou, a pepehi
 mai i ke kulanakauhale nei me ka maka o
 ka pahikaua.

- 15 I aku la na kanaka o ke alii, Eia hoi makou, e
 hana na kauwa au i ka mea au e olelo mai.
- 16 Hele aku la ke alii iwaho, a o kona ohana
 a pau mahope ona: waiho iho lake alii i
 na wahine he umi, he mau haiawahine e
 malama i ka hale.
- 17 Hele aku la ke alii iwaho, a o na kanaka a
 pau mahope ona, a kakali aku la ma kahi
 mamao aku.
- 18 Hele pu aku la kana poe kauwa a pau me ia;
 heleaku la hoi imua o ke alii ka poe Kereti a
 pau, a o ka poe Peleti a pau, me ka poe Giti
 a pau, eono haneri kanaka ka poe hele mai
 mamuli ona mai Gata mai.
- 19 Alaila i aku la ke alii ia Itai ke Giti, No ke aha hi oe
 e hele pu ai me makou E hoi hou i kou wahi,
 a e noho me ke alii, no ka mea, he malihini
 oe, a no ka aiha e mai.
- 20 Inehinei wale no kou hele ana mai, a e pono no
 anei e hooauwana aku au ia oe iluna a ilalo
 me makou Ke hele nei au i kuu wahi e hele
 ai; nolala, e hoi oe, a e kono pu me oe i ou
 mau hoahar nau: a me oe no ke alohaia mai
 a me ka oiaio.
- 21 Olelo mai la o Itai i ke alii, i mai la, Ma ke ola
 ana o Iehova, a me ke ola ana o ko'u haku
 o ke alii, he oiaio no, ma na wahi a pau a
 kuu haku a ke alii e noho ai me ka make
 paha, a me ke ola paha, malaila pu no hoi
 kau kanwa nei.

22 I aku la ke alii ia Itai, E hele pu, a e hele aku hoi oe ma kela aoao. Hele aku la o Itai ke Giti ma kela aoao me na kanaka ona a pau, a me na kamalii a pau me ia.

23 Uwe aku la ko ka aina a pau me ka leo nui, a hele nui aku la na kanaka ma kela aoao: o ke alii no hoi kekahī i hele aku ma kela aoao o ke kahawai o Kederona; a hele aku la na kanaka a pau i ke ala o ka waonahele.

24 Aia hoi o Zadoka a me ka poe Levi a pau me ia, e halihali ana i ka pahu berita o ke Akua: kau iho la lakou i ka pahu o ke Akua ilalo; a pii aku la o Abiatara, a pau mai na kanaka i ka hele mailoko mai o ke kulanakauhale.

25 I aku la ke alii ia Zadoka, E hoihoi oe i ka pahu o ke Akua iloko o ke kulanakauhale: ina paha e loaa ia'u ke aloha ma na maka o Iehova, alaila e hoihoi mai kela ia'u, a e hoike mai ia mea ia'u a me kona wahi noho.

26 Aka, ina paha e olelo mai kela, Aole o'u oluolu ia oe; eia hoi wau, e hana mai kela ia'u e like me ka mea i pono ia ia.

27 I aku la hoi ke alii ia Zadoka ke kahuna, aole anei oe he kaula? E hoi hou oe i ke kulanakauhale me ke aloha, me kau mau keikikane elua me Ahimaaza kau keiki, a me Ionatana ke keiki a Abiatara.

28 Aia, e kali no wau ma ka papu o ka waonahele, a loaa ia'u ka olelo mai o olua mai la e hoike mai ai ia'u.

29 Nolaila, hoihoi aku la o Zadoka laua o Abiatara i ka pahu o ke Akua i Ierusalema: a noho iho la laua ilaila.

- 30** Pii aku la o Davida ma ke alapii o Oliveta, e uwe ana ma kona hele ana, me ka uhiia o kona poo; a hele kamaa ole ia: a uhi iho la kela kanaka keia kanaka me ia i kona poo; a pii aku la lakou, a uwe iho la ma ko lakou hele ana.
- 31** I mai la kekahia ia Davida, Aia o Ahitopela me ka poe kipi me Abesaloma. I aku la o Davida, E Īehova, ke pule aku nei au ia oe, e hoolilo oe i ka oleloao a Ahitopela i mea lapuwale.
- 32** A hiki aku la o Davida iluna, kahi ana i hoomana aku ai i ke Akua, aia hoi, hele mai la o Husai no Areki e halawai me ia, ua haehae kona kapa, a he lepo maluna o kona poo.
- 33** I aku la o Davida ia ia, Ina paha e hele pu oe me au, alaila e kaumaha wau ia oe:
- 34** Aka, i hoi hou aku paha oe i ke kulanakauhale, a e i aku ia Abesaloma, E hookauwa aku au nau, e ke alii, e like me ka'u i hookauwa aku ai na kou makuakane mamua, pela hoi au e hookauwa aku ai nau; alaila, e hiki paha ia oe ke hoolilo i ka oleloao a Ahitopela i mea ole no'u.
- 35** A o Zadoka laua o Abiatara na kahuna, aole anei laua pu kekahia me oe? Nolaila, o kau mea e lohe mailoko mai o ka hale o ke alii, oia kau e hai aku ai ia Zadoka a me Abiatara na kahuna.
- 36** Aia no me laua ka laua mau keikikane o Ahimaza ka Zadoka a o Ionatana ka Abiatara, a ma o laua la e hoouka mai ai oukou i na mea a pau a oukou e lohe ai.

³⁷ Alaila hoi aku la o Husai ka hoalauna o Davida maloko o ke kulanakauhale; a hele mai la hoi o Abesaloma i Ierusalem.

16

- ¹ A HALA iki aku la o Davida mai kahi kiekie o ka puu aku, aia hoi, halawai mai la me ia o Ziba ke kauwa a Mepiboseta, me na hoki elua i hoeeia e na noho, a maluna iho o laua elua haneri pai berena, me na huiwaina maloo he haneri, me na ope huafiku maloo he haneri, a me kekahi huewaina.
- ² Ninau aku la ke alii ia Ziba, I me aha keia mau mea ia oe? I mai la o Ziba, O na hoki, no na ohua o ke alii ia e holo ia; a o ka berena a me ka hua maloo, na na kanaka opiopio ia e ai ai; a o ka waina, no ka poe nawaliwali ia e inu ai ma ka waonahele.
- ³ Ninau aku la ke alii, Auhea la ke keiki a kou haku? I aku la o Ziba i ke alii, Aia no e noho la ma Ierusalem: no ka mea, i aku la ia, I keia la e hoihoi mai ana ka ohana a Israela i ke aupuni o ko'u kupunakane no'u.
- ⁴ Alaila, i mai la ke alii ia Ziba, Aia hoi, nou no na mea a pau i pili no Mepiboseta. I aku la o Ziba, Ke noi haahaa aku nei au ia oe, i loaa ia'u ke aloha imua o kou maka, e kuu haku, e ke alii e.
- ⁵ A hiki aku la o Davida ke alii i Bahurima, Aia hoi, puka mai la iwaho kekahi kanaka no ka ohana a Saula, o Simei kona inoa, o ke keiki a Gera; hele mai la ia iwaho, a kuamuamu mai la i kona hele ana mai.

- 6** Nou aku la ia i na pohaku ia Davida, a i na kauwa
a ke alii a Davida: ma kona akau a ma kona
hema ka poe kanaka a pau, a me ka poe koa
a pau.
- 7** Penei ka Simei i olelo ai i kana kuamuamu ana,
E puka oe iwaho, e puka oe iwaho, e ke
kanaka koko, ke kanaka Beliala.
- 8** Ua hoopai mai o Iehova maluna iho ou i ke koko
a pau o ka ohana a Saula, nona kou wahi i
nohoalii ai: a na haawi aku o Iehova i ke
aapuni iloko o ka lima o Abesaloma o kau
keiki: aia hoi oe maloko o kou kolohe, no ka
mea, he kanaka koko oe.
- 9** Alaila, i aku la o Abisai ke keiki a Zeruia i ke alii,
No ke aha la e kuamuamu mai ai keia ilio
make i kuu haku i ke alii? E hele aku paha
wau i o, a e oki ae i kona poo.
- 10** I mai la ke alii, Heaha ka'u ia olua, e na keiki
a Zeruia? E kuamuamu mai no oia pela;
no ka mea, ua olelo mai no o Iehova ia ia,
e kuamuamu ia Davida. Owai hoi ke olelo
aku, No ke aha la oe i hana'i pela?
- 11** I aku la o Davida ia Abisai a me kana poe kauwa
a pau, Aia hoi ka'u keiki, ka mea i puka ae
mailoko aku o'u, ua imi mai kela i kuu ola:
e oiaio no hoi keia mamo a Beniamina. E
waiho pela, e aho oia ke kuamuamu mai; no
ka mea, ua olelo mai o Iehova ia ia.
- 12** Malia paha e nana mai o Iehova i kuu ehaeha,
a e hoomaikai paha o Iehova ia'u no kana
kuamuamu ana mai i keia la.
- 13** A i ka hele ana o Davida a me na kanaka ona ma
ke ala, hele aku la hoi o Simei ma ka aoao
o ka puu e ku pono ana ia ia; a i kona hele

ana, kuamuamu mai la ia, nou mai la i na pohaku ia ia, a hoolei mai la hoi i ka lepo.

¹⁴ Maluhiluhi iho la ke alii a me ka poe kanaka a pau me ia, a hoomaha iho la ilaila.

¹⁵ Hele mai la o Abesaloma a me na kanaka a pau o ka Israela i Ierusalem, a o Ahitopela kekahia me ia.

¹⁶ A hiki aku la hoi o Husai no Areki, ka hoalauna o Davida io Abesaloma la, i aku la o Husai ia Abesaloma, E ola ke alii, e ola ke alii.

¹⁷ I mai la o Abesaloma ia Husai, Oia anei kou aloha i kou hoalauna? Heaha hoi kau i hele ole aku ai me kou hoalauna?

¹⁸ I aku la o Husai ia Abesaloma, Aole, o ka mea a Iehova, a o keia poe kanaka, a o na kanaka o ka Israela a pau e koho ai, nona no wau, a e noho pu au me ia.

¹⁹ Nawai la hoi au e hookauwa aku ai, ke ole ma ke alo o kana keiki? Me au i hookauwa aku ai ma ke alo o kou makuakane, pela hoi au e hookauwa aku ai ma Kou alo.

²⁰ Alaila, i mai la o Abesaloma ia Ahitopela, E kukakuka oukou i ka mea a kakou e hana aku ai.

²¹ I aku la o Ahitopela ia Abesaloma, E komo aku oe iloko i na haiawahine a kou makuakane, ana i waiho ai e kiai i ka hale; a e lohe ka Israela a pau e hoowahawahaia oe e kou makuakane, alaila e ikaika ai na lima o ka poe a pau me oe.

²² Nolaila, kukulu lakou i haleole no Abesaloma maluna o ka hale; a komo aku la o

Abesaloma maloko i na haiawahine a kona
makuakane, imua o ka Israela a pau.

²³ A o ka oleloao a Ahitopela i olelo aku ai ia mau la,
ua like ia me ka ke Akua olelo a ke kanaka
i ninau aku ai: pela no ka oleloao a pau a
Ahitopela ia Davida a me Abesaloma.

17

- ¹ OLELO aku la o Ahitopela ia Abesaloma, He pono na'u e wae aku ano i na kanaka he umikumamalua tausani, a e ku ae au a e hahai aku mahope o Davida i neia po.
- ² A e loaa aku ia'u ia oi nawaliwali ia a me ke kanaka ole, a e hooweliweli aku au ia ia; a e holo aku na kanaka a pau me ia; a o ke alii wale no ka'u e pepehi aku ai.
- ³ A e hoihoi mai nei au i na kanaka a pau iou nei; o ke kanaka au e imi nei, na like ia me ka hoi hou ana mai o lakou a pau: pela e malu ai na kanaka a pau.
- ⁴ He pono keia olelo i ka manao o Abesaloma a me na lunakahiko a pau o ka Israela.
- ⁵ Alaila, i mai la o Abesaloma, E kahea aku hoi ia Husai no Areki; e lohe hoi kakou i kana olelo.
- ⁶ A hiki mai o Husai io Abesaloma la, olelo mai la o Abesaloma ia ia, i mai la, Pela ka Ahitopela i olelo mai ai: e hana anei kakou e like me kana olelo? A i ole, e olelo mai hoi oe.
- ⁷ I aku la o Husai ia Abesaloma, O ka oleloao a Ahitopela ana i olelo mai ai, aohe pono ia i neia manawa.

- ⁸ No ka mea, wahi a Husai, ua ike oe i kou makuakane a me na kanaka ona, he poe kanaka ikaika lakou, a ua ukiuki ko lakou naau me he bea la i kailiia aku kana ohana keiki ma ke kula; he kanaka kaua no hoi kou makuakane, aole ia e moe me na kanaka.
- ⁹ Aia no ia ua pee ma kekahi lua, i kekahi wahi paha: a i ka haule mua ana o kekahi mau mea o lakou, e olelo auanei ka poe lohe, He lukuia iwaena o ka poe hahai ia Abesaloma;
- ¹⁰ A o ke koa, ka mea naau e like me ka naau o ka liona, e hehee loa ia: no ka mea, ua ike ka Iseraela a pau, he kanaka koa kou makuakane, a he poe kanaka ikaika hoi ka poe me ia.
- ¹¹ Nolaila, eia kuu manao ke hai aku nei, I hoakoakoia mai ka Iseraela a pau iou nei, mai Dana a hiki i Beeraseba, e like me ke one o ke kai ka nui loa; a e hele oe iho no i ke kaua.
- ¹² Pela kakou e hiki aku ai io na la i kahi e loaa aku ai ia ia, a e kau aku kakou maluna ona, e like me ka hau e kau mai maluna o ka honua: a oia, a o ka poe a pau me ia, aole loa e koe kekahi o lakou.
- ¹³ A ina paha ua komo aku ia iloko o kekahi kulanakauhale, alaila e lawe aku ka Iseraela a pau i na kaula i ua kulanakauhale la, a e kauo aku kakou ia wahi maloko o ka muliwai, a koe ole ma ia wahi kekahi pohaku liilii.
- ¹⁴ I aku la o Abesaloma a me na kanaka a pau o ka Iseraela, ua oi aku ka pono o ka oleloao a Husai no Areki, mamua o ka oleloao a Ahitopela. No ka mea, ua manao mai o Iehova

e hoolilo i ka oleloao akamai a Ahitopela i mea ole, i mea e hooili mai ai o Iehova i ka ino maluna o Abesaloma.

- ¹⁵ Alaila, olelo aku la o Husai ia Zadoka laua o Abiatara na kahuna, Pela a penei i oleloao aku ai o Ahitopela ia Abesaloma a me na lunakahiko o ka Israela; pela a penei hoi au i oleloao aku ai.
- ¹⁶ Nolaila, e hoouna koke aku olua e hai ia Davida, i ka i ana aku, Mai moe oe i neia po ma na papu o ka waonahale, e hele koke oe ma kela aoao, o pau loa ke alii a me na kanaka me ia i ke aleia.
- ¹⁷ A ua noho o Ionatana laua o Ahimaaza ma Enerogela, no ka mea, aole pono e ikeia laua ke komo iloko o ke kulanakauhale, a hele aku la kekahi kauwawahine, a hai aku la ia laua: hele aku la hoi laua, a hai aku la i ke alii ia Davida.
- ¹⁸ Aka, ua ike no kekahi keiki ia laua, a hai aku la ia Abesaloma: aka, hele koke aku la laua a hiki aku la i ka hale o kekahi kanaka i Bahurima, a he luawai maloko o ka pahale ona, ilaila laua i iho ai.
- ¹⁹ Lalau aku la ka wahine i ka mea uhi, hohola iho la maluna o ka waha o ka luawai, a halii iho la i ka palaoa maluna iho: a ua ike ole ia ua mea la.
- ²⁰ A hiki mai na kauwa a Abesaloma i ua wahine la ma ka hale, ninau mai la lakou, Auhea o Ahimaaza laua o Ionatana? I aku la ka wahine ia lakou, ua hala aku la laua ma kela aoao o ke kahawai. Imi aku la lakou, aole hoi i loaa, alaila hoi hou mai la lakou i Ierusalem.

- ²¹ A hala aku la lakou, pii mai la laua mailoko mai o ka luawai, hele aku la, a hai aku la i ke alii ia Davida. Iaku la ia Davida, Eku ae, e holo koke ma kela aoao o ka wai; no ka mea, penei ka Ahitopela i olelo ku e ai ia oukou.
- ²² Alaila ku ae la o Davida a me na kanaka a pau me ia, a hele aku la ma kela aoao o Ioredane: a i ka wanaao, aole i koe kekahia o lakou i ka hele ole ma kela aoao o Ioredane.
- ²³ A ike aku la o Ahitopela, aole i hanaia e like me kana oleloao, hoee aku la ia i ka noho maluna o kona hoki, ku ae la ia, hoi hou aku la ia i kona wahi, i kona hale iho, i kona kulanakauhale, a kauoha aku la no ko ka hale ona, a kaawe iho la ia ia iho, a make; a ua kanuia oia ma ka halekupapau o kona makuakane.
- ²⁴ Alaila hele aku la o Davida i Mahanaima: a hele aku la hoi o Abesaloma ma kela aoao o Ioredane, oia a me na kanaka a pau o ka Israela me ia.
- ²⁵ Hoonoho aku la o Abesaloma ia Amasa ma ko Ioaba wahi maluna o ka poe kaua: a o ua Amasa la, he keiki ia na kekahia kanaka no ka Israela, o Itera ka inoa, ka mea i komo aku iloko io Abigala la ke kaikamahine a Nahasa, a o ke kaikaina o Zeruia o ka maku wahine o Ioaba.
- ²⁶ Hoomoana iho la ka Israela me Abesaloma ma ka aina o Gileada.
- ²⁷ A hiki aku la o Davida i Mahanaima, ilaila o Sobi ke keiki a Nahasa no Raba o na mamo

a Amona, a o Makira ke keiki a Amiela no Lodebara, a o Barezilai no Rogelima ma Gileada,

²⁸ Lawe mai la lakou i na moe a me na kiahā a me na ipu lepo a me na hua palaoa a me ka bale a me ka palaoa, a me ka palaoa papaa, a me ka papapa maka, a me ka pi, a me ka papapa papaa;

²⁹ A me ka meli, a me ka bata, a mo na hipa, a me ka waiubipipaa, na Davida a na ka poe kanaka me ia e ai ai: no ka mea, olelo ae la lakou, Ua pololi na kanaka, ua luhi a me ka makewai ma ka waonahele.

18

- ¹ HELU aku la o Davida i na kanaka me ia, a hoonoho aku la i na lunatausani, a me na lunahaneri maluna o lakou.
- ² Hoouna aku la o Davida i ka hapakolu o na kanaka malalo o ka lima o Ioaba, a o kekahi hapakolu malalo o ka lima o Abisai ke keiki a Zeruia, o ko Ioaba kaikaina, a o kekahi hapakolu malalo o ka lima o Itai ke Giti. I aku la hoi ke alii i na kanaka, Owau io no kekahi e hele aku ana me oukou.
- ³ Aka, i mai la na kanaka, Aole oe e hele aku; no ka mea, a i hee aku makou, aole lakou e manao mai ia makou; a i make hoi kekahi hapalua o makou, aole no hoi lakou e manao mai ia makou. Aka hoi, ua like oe me ka umi tausani o makou; nolaila, e aho nau e kokua mai ia makou mailoko mai o ke kulanakauhale.

- ⁴ Iaku la ke alii ia lakou, O ka oukou pono ka'u e hana'i. Ku ae la ke alii ma ka aoao o ka ipuka o ka pa, a haele mai la na kanaka a pau iwaho ma na haneri a ma na tausani.
- ⁵ Kauoha aku la ke alii ia Ioaba me Abisai a me Itai, iaku la, E ahonui aku oukou no'u i ke kanaka opiopio ia Abesaloma. A lohe ae la na kanaka a pau, i ka wa i kauoha aku ai ke alii i na lunakoa a pau no Abesaloma.
- ⁶ Alaila hele aku la na kanaka iwaho ma ke kula e ku e i ka Iseraela: aia ma ka ululaau o Eperaima ke kaua ana.
- ⁷ Ilaila ua pepehia na kanaka o ka Iseraela imua o ka poe kauwa a Davida: a he luku nui no ia la ma ia wahi, o na kanaka he iwakalua tausani.
- ⁸ No ka mea, kaua liilii lakou malaila maluna o ka aina a pau: a ua oi ka nui o ka poe i make i ka laau ia la, i ka poe i make i ka pahikaua.
- ⁹ A halawai ae la o Abesaloma me na kauwa a Davida. A holo ae la o Abesaloma maluna o ka hoki, a hele aku la ka hoki malalo o na lala pilikia o kekahia laau oka nui, a hihiia ae la kona poo i ka laau, a kaulia oia mawaena o ka lani a o ka honua, a hele aku la ka hoki mai lalo aku ona.
- ¹⁰ Ike aku la kekahia kanaka ia mea, a hai aku la ia Ioaba, iaku la, Aia ua ike aku au ia Abesaloma e kau ana maloko o kekahia laau oka.
- ¹¹ I mai la o Ioaba i ke kanaka nana i hai aku ia ia, Aia hoi, ua ike aku oe; heaha hoi kau i pepehi ole ai ia ia a haule ia i ka houna?

alaila haawi aku no wau ia oe i na apana kala he umi a me kekahia kaei.

12 Iaku la ua kanaka la ia Ioaba, Ina paha e kau ana ma kun lima na apana kala he tausani, aole au e o aku i kuu lima e pepehi i ke keiki a ke alii: no ka mea, i ko makou lohe ana, ua kauoha mai ke alii ia oe, me Abisai a me Itai, i mai la, E malama oukou a pau i ke kanaka opiopio ia Abesaloma.

13 Ina ole pela, ina ua hana au ma ka wahahhee e hihia ai ko'u ola: no ka mea, aohe mea i huniaia mai ke alii aku, a o oe no hoi kekahia e ku e ia'u.

14 Alaila, iaku la o Ioaba, Aole au e pono ke kali wale penei imua ou. Lalau aku la ia i na ihe ekolu ma kona lima, a hou aku la ia mau mea maloko o ka puu o Abesaloma, oi ola kela mawaena o ka laau oka.

15 Hoopuni mai la ka poe umi nana i lawe i ka Ioaba mea kaua, pepehi aku la ia Abesaloma, a make iho la ia.

16 Puhi aku la o Ioaba i ka pu, a hoi mai la na kanaka mai ke alualu ana'ku i ka Israela: no ka mea, ua paa na kanaka ia Ioaba.

17 Lawe aku la lakou ia Abesaloma; a hoolei aku la ia ia maloko o ka lua nui ma ka ululaau, a kau aku la lakou i ahu pohaku nui maluna iho ona: a holo aku la ka Israela a pau, o kela mea keia mea i kona halelewa.

18 A o Abesaloma i kona wa e ola ana, lawe aku la ia a hooku ae la i kekahia kia pohaku ma ke awawa o ke alii: no ka mea, iaku la ia, Aole a'u keikikane nana e hoomau i kuu inoa; a

kapa aku la ia i ua kia pohaku la ma kona
inoa iho: a ua kapaia'ku ia ko Abesaloma
wahi, a hiki i neia manawa.

- ¹⁹ Alaila i aku la o Ahimaaza ke keiki a Zadoka, E ae mai oe e holo aku au ano, e lawe aku i ka olelo i ke alii, ua hoopakele aku o Iehova ia ia mai na lima aku o kona poe enemi.
- ²⁰ I mai la o Ioaba ia ia, Aole no oe e lawe aku i ka olelo i keia la; e lawe olelo oe i kekahia ae: i keia la, aole oe e lawe olelo aku, no ka mea, ua make ke keikikane a ke alii.
- ²¹ Alaila i aku la o Ioaba ia Kusi, O hele oe e hai i ke alii i ka mea au i ike iho nei. Kulou iho la o Kusi ia Ioaba, a holo aku la.
- ²² I hou aku la o Ahimaaza ke keiki a Zadoka ia Ioaba, Owau hoi kekahia, ke noi aku nei au ia oe, e holo aku au mahope o Kusi. I mai la o Ioaba, No ke aha hoi oe e holo aku ai, e kuu keiki, aohe olelo e pono nau?
- ²³ E ae mai hoi oe e holo wau. I mai la kela ia ia, E holo. Alaila holo aku la o Ahimaaza ma ka aoao o ka papu, a oi aku la ia imua o Kusi.
- ²⁴ Noho iho la o Davida mawaena o na puka elua o ka pa, a pii aku la ke kiai maluna o ka puka ma ka pa pohaku; alawa ae la kona mau maka, nana aku la, aia he kanaka e holo mai ana, oia wale no.
- ²⁵ Hea mai la ke kiai, a hai mai la i ke alii. I aku la ke alii, Ina hookahi wale no oia, he olelo no ma kona waha. Neenee mai la no ia, a kokoke mai.
- ²⁶ Ike aku la hoi ke kiai i kekahia kanaka e ae e holo mai ana: hea mai la ke kiai i ka malama

puka, Aia hoi, he kanaka e holo hookahi mai ana. Iaku la ke alii, Ke lawe mai nei hoi oia i ka olelo.

²⁷ I mai la ke kiai, Ua like ka mea holo mua i kuu manao me ka holo ana o Ahimaaza ke keiki a Zadoka. Iaku la ke alii, He kanaka maikai ia, a ke hele mai nei ia me ka olelo maikai.

²⁸ Kahea mai la o Ahimaaza, i mai la i ke alii, Aloha oe. A haule iho la ia ilalo ke alo ma ka honua imua o ke alii, i mai la, E hoomaikaiia o Iehova o kou Akua, nana i hoolilo mai i ka poe kanaka i hookiekie ae i ko lakou lima e ku e i kuu haku i ke alii.

²⁹ Iaku la ke alii, Ua malama ola ia ke kanaka opio, o Abesaloma? I mai la o Ahimaaza, A hoouna mai la o Ioaba i ke kauwa a ke alii, a ia'u hoi i kau kauwa, ua ike aku au i ka wawa nui, aole hoi au i ike i ke ano.

³⁰ Iaku la ke alii, E kipa ae oe a e ku maanei. Kipa ae la ia, a ku malie iho la.

³¹ Aia hoi, hele mai la o Kusi: i mai la o Kusi, He olelo ka'u e kuu haku, e ke alii; ua hoapono mai o Iehova ia oe i keia la i ka poe a pau i hoea mai e ku e ia oe.

³² Iaku la ke alii ia Kusi, Ua malama ola ia anei ke kanaka opio o Abesaloma? I mai la o Kusi, O ka poe enemi o kuu haku o ke alii, a o ka poe a pau i ku e mai e hoino mai ia oe, e hoolikeia lakou me ua kanaka opio la.

³³ Haaloulou nui iho la ke alii, a pii aku la i ke keena maluna o ka puka, a uwe iho la: a i kona hele ana, penei kana i olelo ai, Auwe!

kuu keiki e Abesaloma e! e kuu keiki, kuu keiki e Abesaloma e! ina no wau i make nou, e Abesaloma kuu keiki, kuu keiki e!

19

- ¹ U A haiia'ku ia Ioaba, Aia ke uwe nei ke alii, a ke kanikau nei oia no Abesaloma.
- ² Ia la, lilo ae la ke ola i mea e kanikau ai o na kanaka a pau: no ka mea, ua lohe na kanaka ia la, i ka haiia mai o ka uwe ana o ke alii no kana keiki.
- ³ A hoi malu aku la na kanaka iloko o ke kulanakauhale ia la, e like me na kanaka hilahila e holo malu aku, ke hee lakou i ke kaua.
- ⁴ Aka, o ke alii, pulou iho la ia i kona maka, a uwe aku la ke alii me ka leo nui, E kuu keiki e Abesaloma e! e Abesaloma kuu keiki, kuu keiki e!
- ⁵ Hele akula o Ioaba iloko o ka hale i ke alii, i akula, Ua hoohilahila oe i keia la i na maka o kau poe kauwa a pau, o ka poe nana i malama i kou ola, a me ke ola o kau mau keikikane, a me kau mau kaikamahine, a me ke ola o kau mau wahine, a me ke ola o kau mau haiawahine;
- ⁶ Ma kou aloha ana aku i kou poe enemi, a me ka hoowahawaha ana i kou poe hoalauna: no ka mea, ua hoike mai oe i keia la, he mea ole ia oe na alii a me na kauwa: a ke ike nei au i keia la, ina paha i ola o Abesaloma, a make makou a pau i keia la, ina ua oluolu io no oe.
- ⁷ Ano hoi, e ala'e oe, e hele iwaho, a e olelo hoolulu aku i kau poe kauwa. Ke hoohiki aku nei au ma o Iehova la, a i hele ole aku oe, aole e

noho kekahi me oe i neia po; a e ino loa aku ia mea, i na mea ino a pau i hiki mai iou la mai kou wa opiope a hiki ia nei.

8 Alaila ala'e la ke alii, a noho iho la ma ka ipuka o ka pa. Hai aku la lakou i na kanaka a panu, Aia hoi, ke noho mai la ke alii ma ka ipuka. A hele mai la na kanaka a pau imua o ke alii; no ka mea, ua mahuka aku la ka Israela o kela kanaka keia kanaka a pau i kona halelewa iho.

9 Hoopaapaa ae la na kanaka a pau ma na ohana a pau o ka Israela, i ae la, Ua hoola mai ke alii ia kakou mai ka lima ae o ko kakou poe enemi, a ua hoopakele hoi oia ia kakou mai ka lima ae o ko Pilisetia: ano hoi, ua holo aku no ia mawaho o ka aina no Abesaloma.

10 A o Abesaloma ka mea a kakou i poni ai i alii maluna o kakou, ua make ia iloko o ke kaua: heaha hoi ka mea e olelo ole aku ai oukou i kekahi huaoolelo no ka hoihoi ana mai i ke alii?

11 Hoouna aku la o Davida ke alii io Zadoka la a me Abiatara na kahuna, iaku la, E olelo aku olua i na lunakahiko o ka Iuda, e iaku, No ke aha la e lohi loa nei oukou i ka hoihoi ana mai i ke alii i kona hale? no ka mea, ua hiki mai ka olelo a ka Israela a pau i ke alii, a i kona ohana.

12 Oukou no na hoahanau o'u, oukou no ko'u mau iwi a me ko'u io; no ke aha hoi e lohi loa nei oukou i ka hoihoi aku i ke alii?

13 E iaku hoi olua ia Amasa, Aole anei oe no kuu iwi a me kuu io? Pela ke Akua e hana mai

ai ia'u, a nui aku, i ole oe ka lunakaua mau
imua o'u ma ko Ioaba wahi.

14 Hoohuli mai la kela i ka naau o na kanaka a pau
o ka Iuda, e like me ko ke kanaka hookahi;
nolaila, olelo aku la lakou i ke alii, E hoi hou
mai oe a me au mau kauwa a pau.

15 Alaila hoi mai la ke alii, a hiki mai i Ioredane.
A hele mai la ka Iuda i Gilegala e halawai
me ke alii, a e alakai i ke alii ma keia aoao o
Ioredane.

16 Ao Simei ke keiki a Gera, he mamo na Beni-
amina no Bahurima, wikiwiki ae la ia a iho
pu aku la me na kanaka o ka Iuda e halawai
me ke alii me Davida.

17 Me ia pu na kanaka o ka Beniamina he tausani,
a o Ziba ke kauwa na ka ohana a Saula, a
me ia hoi na keikikane ana he umikuma-
malima, a me na kauwa ana he iwakalua:
hele mai la lakou ma keia aoao o Ioredane
imua o ke alii.

18 A holo ae la ka waapa e alo mai i ko ka hale o
ke alii, a e lawelawe hoi i ka mea a ke alii
i manao ai he pono. Moe iho la o Simei ke
keiki a Gera imua o ke alii i kona pae ana i
keia aoao o Ioredane.

19 I mai la ia i ke alii, mai manao hewa mai kuu
haku ia'u, aole hoi e hoomauhala i ka mea
a kau kauwa i hana kolohe aku ai i ka la
a kuu haku a ke alii i puka mai ai iwaho o
Ierusalem, i waiho ai ke alii ia mea maloko
o kona naau.

20 No ka mea, ke ike nei kau kauwa; ua hana hewa
no wau: nolaila, eia au i hele mai nei, ka
mea mua o ka ohana a Iosepa, i iho mai e
halawai me kuu haku me ke alii.

- 21** Olelo mai la o Abisai ke keiki a Zeruia, i mai la,
 Aole anei e make o Simei ia mea; no ka mea,
 ua hoino mai ia i ka Iehova mea i poniia?
- 22** I aku la o Davida, Heaha ka'u ia olua, e na keiki
 a Zeruia, i ku e mai ai olua ia'u i keia la? E
 make anei kekahī kanaka i keia la iloko o ka
 Israela? Aole anei au i ike, owau no ke alii
 i keia la maluna o ka Israela?
- 23** I aku la ke alii ia Simei, Aole oe e make: a hoohiki
 aku la ke alii ia ia.
- 24** Ihoaku la hoi o Mepiboseta ka moopuna a Saula
 e halawai me ke alii; aole ia i hooponopono
 i kona mau wawae, aole i hoomaikai i kona
 umiumi, aole no hoi i holoi i kona kapa, mai
 ka la i hele aku ai ke alii, a hiki i ka la i hoi
 hou mai ai ia me ka malu.
- 25** A hiki mai la ia i Ierusalema e halawai me ke alii,
 i aku la ke alii ia ia, E Mepiboseta, heaha kau
 i hele pu ole ai me au?
- 26** I mai la kela, E kuu haku, e ke alii, ua hoop-
 unipuni mai kuu kauwa ia'u: no ka mea,
 i aku la kau kauwa, e hoee aku no au i ka
 noho maluna o ka hoki no'u, i holo ai au
 maluna, a hele aku i ke alii; no ka mea, he
 oopa kau kauwa.
- 27** A ua alapahi kela i kau kauwa imua o kuu haku o
 ke alii; a ua like kuu haku ke alii me ka anela
 o ke Akua; nolaila, e hana aku oe i ka mea
 pono ma kou maka.
- 28** No ka mea, ua like me na kanaka make ka poe
 ohana a pau o kuu kupunakane imua o kuu
 haku o ke alii; aka, ua hoonoho oe i kau
 kauwa iwaena o ka poe nana i ai ma kou

papaaina iho: heaha hoi kuu pono e kahea
hou aku ai i ke alii?

²⁹ Iaku la ke alii ia ia, No ke aha oe e olelo hou mai
nei no kau mau mea? Ua olelo aku no wau,
E hoolike a like olua me Ziba i ka aina.

³⁰ I mai la o Mepiboseta i ke alii, Ae, e lawe kela
nona i na mea a pau: no ka mea, ua hoi hou
mai nei kuu haku ke alii i kona hale me ka
malu.

³¹ Iho mai la hoi o Barezilai no Gileada mai Roge-
lima mai a hele pu mai me ke alii ma keia
kapa o Ioredane, e alakai ia ia ma neia aoao
o Ioredane.

³² He kanaka elemakule o Barezilai; he kanawalu
kona mau makahiki: a hanai aku la ia i ke
alii i kona wa i noho ai ma Mahanaima; no
ka mea, he kanaka koikoi nui loa ia.

³³ Iaku la ke alii ia Barezilai, E hele pu oe me au, a
e hanai aku no au ia oe ma Ierusalema.

³⁴ I mai la o Barezilai i ke alii, Ehia mau la o kuu ola
e koe, i pii aku ai au me ke alii i Ierusalema?

³⁵ He kanawalu na makahiki o'u i keia la; e hiki
anei ia'u ke ike mawaena o ka pono a me
ka hewa? Ua ono anei i kau kauwa ka'u
mea e ai ai, a me ka'u mea e inu ai? e lohe
hou anei au i ka leo o na kane mea mele a
me na wahine mea mele? no ke aha hoi e
hookaumaha aku ai kau kauwa i kuu haku
i ke alii?

³⁶ E hele ana kau kauwa ma o iki aku o Ioredane
me ke alii: no ke aha hoi e hoouku mai ai ke
alii ia'u ia ukū nui?

³⁷ Ke noi aku nei au ia oe, e ae mai oe i kau kauwa
e hoi hou aku ia, i make au maloko o kuu
kulankauhale, ma ka halekupapau o kuu

makuakane a me uku maku wahine. Aka, eia hoi kau kauwa o Kimehama; e aho e hele pu ia me kuu haku me ke alii; e hana aku oe ia ia e like me ka mea pono ia oe.

38 I aku la ke alii, E hele pu o Kimehama me au, a e hana aku au ia ia ma ka mea pono ia oe: a o ka mea au e makemake mai ai ia'u, oia ka'u e hana aku ai nou.

39 Hele mai la na kanaka a pau ma neia aoao o Ioredane. A pae mai ke alii, alaila honi ae la ke alii ia Barezilai, a hoomaikai aku la ia ia, a hoi hou aku la ia i kona wahi.

40 Alaila hele aku la ke alii i Gilegala, a hele pu aku la o Kimehama me ia: a alakai aku la na kanaka a pau o ka Iuda i ke alii, a pela hoi kekahi hapa o na kanaka o ka Israela.

41 Aia hoi, hele mai la na kanaka a pau o ka Israela i ke alii, i aku la i ke alii, No ke aha la i aihue aku ai ko makou mau hoahanau na kanaka o ka Iuda ia oe, a ua kai mai i ke alii a me ko ka hale ona, a me na kanaka o Davida a pau me ia ma keia kapa o Ioredane?

42 Olelo aku la na kanaka a pau o ka Iuda i na kanaka o ka Israela, no ka mea, ua hookahi kona hanauna me ko makou; heaha ka oukou e huhu mai nei ia mea? Ua ai iki anei makou i ka ke alii? a ua haawi mai anei ia i ka manawalea ia makou?

43 Olelo aku la na kanaka o ka Israela i na kanaka o ka Iuda, i ae la, He umi mau hakina o ke alii ka makou, a he nui aku ka makou ia Davida i ka oukou: no ke aha hoi oukou i hoowahawaha ai ia makou, i lilo ole ka

makou olelo no ka hoihoi ana mai i ke alii i ka mea mua? A o ka olelo ana a na kanaka o ka Iuda, he ikaika aku ia i ka olelo ana a na kanaka o ka Israela.

20

- ¹ I LAILA kekahi kanaka hewa, o Seba kona inoa, ke keiki a Bikeri, he mamo a Beniamina: puhi aku la ia i ka pu, iaku la, Aole a kakou kuleana iloko o Davida, aole hoi he hooilina iloko o ke keiki a Iese: e hoi no kela kanaka keia kanaka a pau i kona halelewa, e ka Israela.
- ² Alaila pii aku la na kanaka a pau o Israela mai o Davida aku la, a hahai aku la lakou ia Seba ke keiki a Bikeri: aka, hoopili aku la na kanaka o ka Iuda i ko lakou alii, mai Ioredane a hiki i Ierusalem.
- ³ Hele mai la o Davida i kona hale i Ierusalem: a lawe ae la ke alii i ua mau haiawahine la he umi ana i waiho ai e kiai i ka hale, a hahao ae la ia lakou iloko o ka halepaahao, a hanai aku la ia lakou; aka, aole ia i komo aku iloko io lakou la. Pela lakou i paa ai e noho kane ole ana, a hiki i ko lakou la make.
- ⁴ Alaila i aku la ke alii ia Amasa, E houluulu oe no'u i na kanaka o ka Iuda i na la ekolu, a e hoi hou mai maanei.
- ⁵ Alaila hele aku la o Amasa e houluulu i ka Iuda: aka, ua lohi kela a hala ka manawa i haawiia nona.
- ⁶ I aku la o Davida ia Abisai, Ano, e oi aku ke ino a Seba ke keiki a Bikeri e hana mai ai ia

kakou mamua o ka Abesaloma: e lawe oe i na kauwa a kou haku, a e alualu aku ia ia, o loaa ia ia na kulanakauhale i paa i ka pa, a hoopakele ia ia iho mai o kakou aku.

⁷ A hele aku la mamuli ona na kanaka o Ioaba, me ka poe Kereti a me ka poe Peleti, a me ka poe kanaka ikaika a pau: puka aku la lakou iwaho o Ierusalema e alualu ia Seba ke keiki a Bikeri.

⁸ Aia hiki aku lakou ma ka pohaku nui i Gibeoua, hele aku la o Amasa imua o lakou. A o ka aahu a Ioaba i aahu iho ai, ua kakuia ia maluna ona, a maluna iho ke kaei; ua paaia ma kona puhaka ka pahikaua maloko o kona wahi: a i kona hele ana aku, haule iho la ia mea.

⁹ I aku la o Ioaba ia Amasa, E ola ana oe, e kuu hoahanau? Lalau aku la Ioaba ia Amasa ma ka umiumi me ka lima akau e honi ia ia.

¹⁰ Aole i manao o Amasa i ka pahikaua ma ka lima o Ioaba: hou aku la kela ia ia me ia mea ma ka lima o ka iwiaoao, a poha mai la kona naau ma ka honua, aole ia i hou hou aku ia ia; a make aku la ia. A alualu aku la o Ioaba a me Abisai kona hoahanau ia Seba ke keiki a Bikeri.

¹¹ Ku mai la kekahi kanaka o Ioaba ma ona la, i mai la, O ka mea makemake ia Ioaba, a o ka mea no Davida, mamuli ia o Ioaba.

¹² Oni ae la o Amasa maloko o ke koko, iwaena o ke kuamoo. A ike ae la ua kanaka la, ua ku malie iho la na kanaka a pau, lawe aku la oia ia Amasa mawaho o ke kuamoo i ke kula, a hohola iho la i ke kapa maluna ona, i kona ike ana ua ku malie kela kanaka keia kanaka i hele mai ma ona la.

- ¹³ A laweia'ku ia mawaho o ke kuamoo, alaila hele
aku la na kanaka a pau mahope o Ioaba, e
alualu ia Seba ke keiki a Bikeri.
- ¹⁴ Hele aku la ia ma na ohana a pau o ka Israela, a
hiki i Abela a i Betemaka; a i ka poe Beerota
a pau: a ua houluuluia e la hoi lakou a hahai
aku la mahope ona.
- ¹⁵ Hiki aku la lakou, a hoopuni ae la ia ia iloko o
Abela-betemaka, hooahu aku la lakou i ka
puu e ku pono i ke kulanakauhale, e ku ana
ia ma ka pa mawaho: kui aku la ko Ioaba
poe kanaka a pau i ka pa pohaku e hoohiolo
ia mea malalo.
- ¹⁶ Alaila, hea mai la kekahi wahine naauao
mailoko mai o ke kulanakauhale, E hoolohe
mai, e hoolohe mai; ke noi aku nei au ia
oukou, e i aku ia Ioaba, E hele mai a kokoke,
i olelo aku ai au me oe.
- ¹⁷ A hiki aku la ia a kokoke io na la, i mai la ka
wahine, O Ioaba anei oe? I aku la ia, Owau
no. Alaila i mai la kela, E hoolohe mai oe i
ka olelo a kau kauwawahine. I aku la ia, Ke
lohe nei au.
- ¹⁸ Olelo mai la kela, i mai la, I olelo io mai la lakou
mamua, i ka i ana, He oiaio no e ninau mai
ana lakou ma Abela, a pela e hooki ai.
- ¹⁹ Owau no ke noho malie a me ka malama
iloko o ka Israela: ke manao nei oe e
luku mai i kekahi kulanakauhale a me ka
makuwahine iloko o ka Israela. No ke aha
la oe e hoopau ai i ka aina a Iehova i hooili
mai ai?
- ²⁰ Olelo aku la o Ioaba, i aku la, Aole loa, aole loa
ia'u ia ke hoopau iho, aole loa ke luku aku.

- ²¹ Aole pela ka mea; aka, he wahi kanaka no ka mauna o Eperaima, o Seba ke keiki a Bikeri ka inoa, ua hookiekie ae ia i kona lima e ku e i ke alii ia Davida: e haawi mai ia ia wale no, a e hoi hou aku no wau mai ke kulanakauhale aku. I mai la ka wahine ia Ioaba, Eia hoi, e kiolaia'ku kona poo i ou la mawaho o ka pa.
- ²² Alaila hele aku la ua wahine la i na kanaka a pau ma kona akamai. A oki iho la lakou i ke poo o Seba ke keiki a Bikeri, a kiola aku la iwaho io Ioaba la. Hookani aku la ia i ka pu, a hoi aku la lakou, o kela kanaka keia kanaka i kona halelewa iho. A hoi aku la o Ioaba i Ierusalem a i ke alii.
- ²³ A o Ioaba, maluna no ia o ka poe kaua a pau no ka Israela: a o Benaia ke keiki a Iehoida, maluna no ia o ka poe Kereti a me ka poe Peleti.
- ²⁴ A o Adorama, maluna no ia o ke auhau: a o lehosapata ke keiki a Ahiluda ke kakau-mooolelo:
- ²⁵ A o Seva ke kakauolelo: a o Zadoka me Abiatara na kahuna:
- ²⁶ A o Ira hoi no Iaira, kekahi alii ia no Davida.

21

- ¹ I LAILA no i na la o Davida na makahiki wi ekolu, i kela makahiki i keia makahiki: a ninau aku la Davida ia Iehova. I mai la o Iehova, No Saula ia, a no kona ohana koko; no ka mea, ua pepehi oia i ko Gibeona.
- ² Kii aku la ke alii i ko Gibeona, i aku la ia lakou; (a o ko Gibeona aole lakou no na mamo a

Iseraela, no ke koena lakou o ka poe Amori; a ua hoohiki aku na mamo a Iseraela ia lakou: a manao iho la o Saula e pepehi ia lakou no kona manao ikaika i na mamo a Iseraela laua o Iuda.)

- 3** I aku la o Davida i ko Gibeona, Heaha ka'u e hana aku ai no oukou? pehea hoi au e hookalahala aku ai, i hoomaikai mai oukou i ka aina a Iehova i haawi mai ai?
- 4** I mai la ko Gibeona ia ia, Aole makou e make-make i ke kala, aole hoi i ke gula no Saula a no kana ohana; aole hoi oe e pepehi i kekahi kanaka iloko o ka Iseraela no makou. I aku la kela, O ka mea a oukou e olelo mai ai, oia ka'u e hana aku ai no oukou.
- 5** I mai la lakou i ke alii, O ke kanaka nana makou i hoopau aku, a i noonoo e luku mai ia makou, i noho ole ai makou ma kekahi palena aina o ka Iseraela,
- 6** E haawia mai na kanaka ehiku o kana mau keiki ia makou, a e kau aku makou ia lakou iluna no Iehova ma Gibeon no Saula o ka mea a Iehova i wae ai. I aku la ke alii, E haawi no wau.
- 7** Aka, kala aku la ke alii ia Mepiboseta ke keiki a Ionatana ke keiki a Saula, no ka hoohiki ana ia Iehova iwaena o laua, iwaena o Davida laua o Ionatana ke keiki a Saula.
- 8** A lawe aku la ke alii i na keikikane elua a Rizepa ke kaikamahine a Aia, i na mea ana i hanau ai na Saula, o Aremoni a o Mepiboseta; a me na keikikane elima a Mikala ke kaikamahine a Saula, na mea ana i hanai ai na Aderiela ke keiki a Barezilai no Mehola.

⁹ A haawi aku la oia ia lakou i na lima o ko Gibeona, a kaawe aku la lakou ia poe maluna o ka puu imua o Iehova; a hina pu iho la lakou a ehiku, a make iho la i na la o ka ohi ai ana, i na la mua o ka ohi bale ana.

¹⁰ Lawe ae la o Rizepa ke kaikamahine a Aia i ke kapa inoino, a halii iho la nona maluna o ka pohaku nui, mai ka wa mua o ka ohi bale ana a hiki i ka wa i haule mai ai ka ua mai ka lani mai maluna iho o lakou, a kiai iho la ia i kau ole ai na manu o ka lewa maluna o lakou i ke ao, aole hoi na holoholona o ke kula i ka po.

¹¹ A ua haiia aku ia Davida ka mea a Rizepa ke kaikamahine a Aia, ka haiawahine a Saula i hana'i.

¹² Hele aku la o Davida, a lawe mai la ia i na iwi o Saula a me na iwi o Ionatana kana keiki mai na kanaka o Iabesagileada mai, ka poe nana i lawe malu ia laua mai ke alanui o Betesana mai, kahi a ka poe Pilisetia i kau ai ia laua, i ka wa i pepehi ai ka poe Pilisetia ia Saula i Gileboa.

¹³ Lawe mai la ia i na iwi o Saula a me na iwi o Ionatana kana keiki mai laila mai; a hoilili ae la lakou i na iwi o ka poe i kaaweaia.

¹⁴ Kanu aku la lakou i na iwi o Saula a o Ionatana kana keiki ma Zela ma ka aina o ka Benamina, maloko o ka halekupapau no Kisa no kona makuakane: a hana aku la lakou i na mea a pau a ke alii i kena aku ai. A mahope iho ua hoomaliuia'ku ke Akua no ka aina.

- 15 A kaua hou mai la ko Pilisetia me ka Iseraela; iho aku la o Davida me kana poe kauwa, a kaua aku la i ko Pilisetia: a paupauaho iho la o Davida.
- 16 A o Isebi-benoba no na keiki a ke kanaka nunui, o kona ihe, ekolu haneri sekela keleawe ia ma ke kaupaona ana, ua kaei oia i ka pahikaua hou, a manao iho la oia e pepehi ia Davida.
- 17 Kokua mai la o Abisai ke keiki a Zeruia ia ia, hahau aku la ia i ke kanaka no Pilisetia, a pepehi iho la ia ia. Alaila papa mai la na kanaka ia Davida, i mai la, Mai hele hou aku oe me makou i ke kaua, i kinai ole iho ai oe i ke kukui no ka Iseraela.
- 18 A mahope iho o keia manawa, he kaua hou me ko Pilisetia ma Goba; a pepehi iho la o Sibekai no Husata ia Sapa no na keiki a ke kanaka nunui.
- 19 He kaua hou no hoi ma Goba me ko Pilisetia, ilaila i pepehi iho ai o Elehanana ke keiki a Iaareoregima no Betelehema i ke kaikaina o Golia no Gata, o ke au o kona ihe, ua like ia me ka laau o ka mea ulana lole.
- 20 A he kaua hou ma Gata, ilaila he kanaka nunui me na manamanalima eono ma kela lima ma keia lima, a me na manamanawawai eono no ma kela wawae ma keia wawae, he iwakaluakumamaha i ka helu ana: ua hanau hoi ia na ke kanaka nunui.
- 21 I kona hoino ana mai i ka Iseraela, pepehi iho la o Ionatana ke keiki a Simea a ke kaikuaana a Davida ia ia.

22 Ua hanau keia poe eha na ke kanaka nunui ma
Gata, a ua haule lakou ma ka lima o Davida,
a me ka lima hoi o kana poe kauwa.

22

1 OLELO aku la o Davida ia Iehova i na huaolelo o
keia mele, i ka la a Iehova i hoopakele ae ia
ia mai ka lima aku o kona poe enemi a pau,
a mai ka lima aku hoi o Saula.

2 I aku la ia,
O Iehova no kuu pohaku, kuu pakaua, a me kuu
hoola;

3 O ke Akua o ko'u pohaku, e paulele aku au
maluna ona;
Oia ko'u palekaua, a me ka pepeiaohao o ko'u ola;
Oia ko'u halekiai kiekie, o kuu puuhonua, a me
kuu hoola;

Ke hoola mai nei oe ia'u, i ke koloheia.

4 E hea aku no wau ia Iehova, ka mea pono ke
hoonaniia'ku:
Pela no wau e hoopakeleia mai ai i ko'u poe enemi.

5 Hoopuni mai la na ale o ka make ia'u,
Hooweliweli mai la ka waikahe o ka poe aia ia'u;

6 Ua puni au i ko ka po mea e paa ai,
A hoohei mai la ia'u na upena o ka make.

7 I ko'u popilikia, kahea aku la au ia Iehova.

Uwe aku la hoi au i ko'u Akua;
A lohe mai la kela i ko'u leo mai kona luakini mai,
A komo aku la hoi ko'u kahea ana iloko o kona
mau pepeiao.

8 Alaila nauwe iho la ka honua me ka haalulu;
Neeaku la na kumu o na lani,
A nauwewe ae la hoi no kona inaina.

- ⁹ Pukoa ae la ka uahi mailoko ae o kona mau pukaihu,
 Mai loko aku o kona waha i ai aku ai ke ahi:
 Ua kukuniia na lanahu e ia.
- ¹⁰ Hoohaahaa iho la oia i na lani, a iho mai la,
 Malalo ae o kona mau wawae ka pouli.
- ¹¹ Holo ae la kela maluna o kekahī keruba, a lele
 ae la no hoi ia;
 Ua ike a no hoi oia maluna o na eheu o ka makani.
- ¹² O ka pouli i puni mai ia ia, oia kana i hoolilo ai i
 wahi noho nona,
 O na wai akoakoa i na ao eleele o ka lani.
- ¹³ Noloko o ka olinolino imua ona, ua kuniia na
 lanahu ahi.
- ¹⁴ Hoohekili mai la o Iehova mai ka lani mai,
 A hoopoha mai la hoi ka Mea kiekie loa i kona leo.
- ¹⁵ Pana mai la ia i na pua, a hoopuehu ia lakou,
 I na uila hoi a hooauhee aku la ia lakou.
- ¹⁶ Alaila ua ike a na kaha o ke kai,
 Ua hoikeia mai no hoi na kumu o ka honua,
 I ka papa ana mai o Iehova,
 I ka nou ana mai o ka hanu o kona mau puka ihu.
- ¹⁷ Kii mai la oia mai luna mai, lalau mai la ia'u;
 Unuhi ae la hoi ia'u mailoko mai o na wai nui:
- ¹⁸ Hoopakele ae hoi oia ia'u i ko'u enemi ikaika,
 A me ka poe i inaina mai ia'u:
 No ka mea, ua oi aku ko lakou ikaika i ko'u.
- ¹⁹ Haule mai la lakou maluna o'u i ko'u la popilikia,
 Aka, ua kokua mai o Iehova ia'u.
- ²⁰ Lawe ae la hoi oia ia'u i kahi akea;
 Hoopakele ae la ia ia'u, no kona makemake mai
 ia'u.
- ²¹ Uku mai la o Iehova ia'u e like me ko'u pono:
 Ua hoihoi mai oia ia'u e like me ka maemae o ko'u
 mau lima.

- ²² No ka mea, ua malama aku au i na aoao o Iehova,
 Aole hoi au i hele hewa aku mai ko'u Akua aku.
- ²³ Mamua hoi o'u kana mau olelo hoopono a pau;
 Aole hoi au i haalele aku i kana mau kauoha.
- ²⁴ Ua kupono hoi au imua ona,
 A ua malama au ia'u iho i kuu hewa.
- ²⁵ Nolaila i uku mai ai o Iehova ia'u e like me ko'u pono;
 E like me ko'u maemae ana imua o kona mau maka.
- ²⁶ I ka mea lokomaikai e hoike mai no oe ia oe iho he lokomaikai;
 I ke kanaka hoopono e hoike mai no oe ia oe iho he pono.
- ²⁷ I ka mea maemae e hoike mai no oe ia oe iho he maemae;
 A i ka mea hookekee e hoike mai no oe ia oe iho he oluolu ole.
- ²⁸ E hoola auanei oe i ka poe i hooluhiiia;
 Aka, ke nana mai nei kou mau maka i ka poe hookiekie, e hoohaahaa iho ai.
- ²⁹ No ka mea, o oe no ko'u kukui, e Iehova:
 A e hoomalamalama mai no o Iehova i ko'u pouli.
- ³⁰ Ma ou la wau i wahi ae i ka poe kaua;
 Ma ko'u Akua wau i lehai aku ai maluna o ka pa pohaku.
- ³¹ A o ke Akua, ua hemolele kona aoao;
 Ua maemae ka olelo a Iehova;
 He palekaua ia no ka poe a pau e paulele maluna ona.
- ³² Owai la ke Akua ke ole o Iehova?
 Owai hoi ka pohaku ke ole ko kakou Akua?
- ³³ O ke Akua no ko'u ikaika a me ko'u mana;
 Ke hoopololei nei oia i ko'u alanui.

- ³⁴ Ke hoomama nei oia i ko'u mau wawae e like me
na wawae dia;
Me ka hoonoho ia'u ma ko'u mau wahi kiekie.
- ³⁵ Ke ao mai nei oia i kuu mau lima e kaua;
I uhaiia'i e ko'u lima ke kakaka keleawe.
- ³⁶ Ua haawi mai hoi oe i kou paku e ola'i;
A o kou ahonui ka i hoonui mai ia'u.
- ³⁷ Ua hooakea oe i ko'u mau kapuwai malalo iho
o'u:
Aole hoi i pahee ko'u mau wawae.
- ³⁸ Ua alualu aku au i ko'u poe enemi,
A ua luku aku au ia lakou;
Aole au i hoi mai a pau e lakou ia'u i ka make.
- ³⁹ Hoopau aku la au ia lakou, me ka pepehi iho;
Aole i hiki ia lakou ke ku ae:
Aia, ua hina lakou malalo iho o ko'u mau wawae.
- ⁴⁰ Ua kakoo mai oe ia'u i ka ikaika e kaua ai;
Ua hookulou iho oe malalo o'u i ka poe i ku e mai
ia'u.
- ⁴¹ Ua haawi mai oe ia'u i na a-i o ko'u poe enemi,
I luku aku ai au i ka poe inaina mai ia'u.
- ⁴² Leha ae lakou, aohe hoi mea e ola'i;
Ia Iehova hoi, aole nae ia i hoolohe mai.
- ⁴³ Alaila pakuikui aku au ia lakou a okaoka me he
lepo la o ka
honua.
A hehi iho la au ia lakou a like me ka nenelu o ke
alanui;
A hooopepe iho la au ia lakou.
- ⁴⁴ Ua hoopakele mai hoi oe ia'u i ka paio ana o ko'u
poe kanaka,
Ua malama mai oe ia'u i poo no na kanaka e:
E hookauwa mai na'u ka lahuikanaka a'u i ike ole
ai.
- ⁴⁵ E hoolohe mai no auanei ia'u na kanaka e,

I ka lohe o ka pepeiao, e malama koke mai no
lakou ia'u.

⁴⁶ E mae aku no na kanaka e,
E makau hoi lakou ma ko lakou wahi paa.

⁴⁷ Ke ola nei o Iehova, e hoomaikaiia ko'u pohaku;
E hapaiia'ku hoi ke Akua o kuu pohaku e ola'i.

⁴⁸ O ke Akua ke hoopai aku no'u,
Me ka hoolilo i na kanaka malalo iho o'u.

⁴⁹ Oia ke hoopakele ia'u i ko'u poe enemi:
Oia hoi ka i hookiekie ae ia'u maluna o ka poe i ku
e mai ia'u;

Ua hoola mai oe ia'u i ke kanaka hoino.

⁵⁰ Nolaila au e hoalohaloha aku ai ia oe, e Iehova,
mawaena o na
kanaka e.

E mele hoomaikai aku au i kou inoa.

⁵¹ Oia ka halekiai no kana alii:

Ua aloha mai ia i kana mea poni,

Ia Davida me kana poe mamo, a mau loa aku.

23

¹ EIA na olelo hope a Davida. I aku la o Davida ke
keiki a Iese, ke kanaka i hookiekiae'e iluna,
ka mea poni a ke Akua o Iakoba, a me ka
mea haku mele maikai no ka Israela,

² Ua olelo aku ka Uhane o Iehova ma o'u nei, a ma
ko'u alelo kana olelo.

³ I mai la ke Akua no ka Israela, olelo mai la ka
Pohaku no ka Israela ia'u, O ka mea e alii
ana maluna o kanaka, e hoopono oia, e alii
ana me ka makau i ke Akua.

⁴ A e like ia me ka malamalama o ke kakahiaka i ka
puka ana o ka la, me ke kakahiaka i uhi ole
ia e ke ao; a e like hoi me ka mauu opio

mailoko mai o ka honua, e kupu ana ma ka malamalama aiai mahope iho o ka ua.

- 5** Ina aole pela ka'u ohana imua o ke Akua; ua hookau mai hoi oia i berita mau loa me au, i hoonohonoho pono ia ma na mea a pau, a i malamaia: no ka mea, oia kuu mea eola'i a pau, a me kuu makemake a pau, ke ole paha ia e hooulu ae ia.
- 6** Aka, e pau no ka poe Beliala i ke kiolaia'ku e like me ka nahele ooi; no ka mea, aole e hiki ke hoopai'a'ku e na lima.
- 7** A o ke kanaka nana lakou e hoopai aku, e pono ia ia ke uhiia i na mea hao, a me ke au o ka ihe, a e pau lakou i ka puhiia maloko o ke ahi ma ia wahi no.
- 8** Eia na inoa o na kanaka ikaika no Davida; o ko Takemoni ka i noho ma ka noho, ka luna o na mea akolu, oia ka mea i hoaka i ka ihe i ku e i na haneri kanaka ewalu, a pepehi aku la i ka manawa hookahi.
- 9** Mahope iho ona o Eleazara ke keiki a Dodo ke keiki a Ahohi, kekahi o na kanaka ikaika ekolu me Davida, ia lakou i ku e i ka poe Pilisetia i kahi i hoakoakoia'e lakou e kaua, a na naholo aku na kanaka o ka Israela.
- 10** Ku ae la ia, a pepehi aku la i ko Pilisetia, a luhi iho la kona lima, a pipili iho la kona lima i ka pahikaua: na Iehova i haawi mai i ka lanakila nui ia la, a hoi hou mai la na kanaka mahope ona a lawe waiwai pio wale no.

- 11** Mahope iho ona o Sama ke keiki a Agee no ka aina mauna. Ua akoakoa ae ko Pilisetia i poe kaua hookahi ma kahi e paapu ana na papapa: a naholo aku la na kanaka mai ko Pilisetia aku.
- 12** Aka, ku ae la oia mawaena konu o ia wahi, a malama aku ia, a pepehi iho la i ko Pilisetia: a haawi mai la o Iehova i ka lanakila nui.
- 13** Iho aku la na mea ekolu o ka poe luna he kanakolu, a hiki aku la io Davida la i ke ana o Adulama i ka wa e ohi ai i ka ai, a hoomoana iho la ko Pilisetia ma ke awawa i Repaima.
- 14** Ilaila o Davida iloko o ka wahi paa, a ma Betelehema ka pakaua o ke Pilisetia ia manawa.
- 15** A makewai iho la o Davida, i iho la, Nani ino kuu makemake e haawi mai kekahi i wai e inu no ka luawai ma Betelehema ma ka ipuka!
- 16** Wahi ae la ua mau kanaka ikaika la ekolu i ke Pilisetia, a huki ae la i ka wai mai loko ae o ka lua ma Betelehema ma ka ipuka, lalau iho la a lawe ae la ia io Davida la: aka, aole ia i manao e inu, a ninini aku no ia mea no Iehova.
- 17** I aku la ia, E Iehova, aole loa au e hana ia mea; aole anei keia ke koko o na kanaka, o ka poe i hele a kokoke i ka make? Nolaila aole ia i make inu ia. Pela i hana'i ia mau kanaka ikaika ekolu.
- 18** A o Abisai ke kaikaina o Ioaba, ke keiki a Zeruia, oia ka luna o kekahi poe ekolu. Hoaka ae la i kana ihe e ku e i na kanaka ekolu haneri,

a pepehi iho la ia lakou: a loaa ia ia ka inoa iwaena o ua mau kanaka ikaika la ekolu.

¹⁹ Aole anei oia ka mea koikoi loa o ka poe ekolu? nolaila oia ko lakou luna: aole hoi i hiki aku kona e like me ko ka poe mua ekolu.

²⁰ O Benaia hoi ke keiki a Iehoiada, ke keiki a kekahi kanaka ikaika, no Kabezeela, he nui kana hana kupanaha: pepehi iho la ia i na kanaka liona elua o ka Moaba: iho iho la hoi ia iloko o ka lua, a pepehi iho la i ka liona i ka manawa hau.

²¹ Pepehi iho la hoi oia i kekahi kanaka no Aigupita, he mea helehelena maikai: he ihe no ma ka lima o ke kanaka no Aigupita, a hele aku la kela io na la me ke kookoo, a kaili ae la i ka ihe mai loko ae o ka lima o ke kanaka Aigupita, a pepehi iho la ia ia me kana ihe.

²² O na mea keia a Benaia a ke keiki a Iehoiada i hana'i, a loaa ia ia ka inoa iwaena o ka poe kanaka ikaika ekolu.

²³ Ua oi aku kona koikoi i ko ka poe kanakolu, aole hoi i hiki aku kona i ko ka poe mua ekolu. A hoonoho aku la o Davida ia ia i kuhina nona.

²⁴ O Asahela ke kaikaina o Ioaba kekahi o ka poe kanakolu; a o Elehanana ke keiki a Dodo no Betelehema,

²⁵ O Sama no Haroda, a o Elika no Haroda,

²⁶ O Heleza no Paleti, o Ira ke keiki a Ikesa no Tekoa,

²⁷ O Abiezera no Anetota, o Mebunai no Husata,

²⁸ O Zalemona no Ahota, o Maharai no Netopati,

- ²⁹ O Heleba ke keiki a Baana no Netopati, o Itai
ke keiki a Ribai no Gibea, no na mamo a
Beniamina,
³⁰ O Benaia no Piratona, o Hidai no na awawa o
Gaasa,
³¹ O Abialebona no Areba, o Azemaveta no Bare-
huma,
³² O Eliaba no Saalebo, o Ionatana no na keikikane
a Iasehena,
³³ O Sama no Harara, Ahlama ke keiki a Sarara no
Harara,
³⁴ O Elipaleta ke keiki a Ahasabai, ke keiki a ka
Maaka, o Eliama ke keiki a Ahitopela no
Gilo,
³⁵ O Hezerai no Karemela, o Paarai no Areba,
³⁶ O Igala ke keiki a Natana no Zoba, o Bani no
Gada,
³⁷ O Zeleka no ka Amona, o Nahari no Beerota,
nana i halihali i na mea kaua no Ioaba ke
keiki a Zeruia.
³⁸ O Ira no Itera, o Gareba no Itera,
³⁹ O Uriā ka Heta, he kanakolu kumamahiku lakou
a pau.

24

- ¹ U A hoaa hou ia ka inaina o Iehova i ka Iseraela,
a ua hoowalewaleia mai o Davida maluna o
lakou, e kena aku ai, E haele e helu aku i ka
Iseraela a me ka Iuda.
² I aku la ke alii ia Ioaba ka lunakaua, e noho
ana me ia, E poaihele oukou i na ohana a
pau o ka Iseraela, mai Dana a hiki aku i
Beereseba, a e helu oukou i na kanaka, i ike
hoi au i ka nui o na kanaka.

- ³ I aku la o Ioaba i ke alii, E hoonui mai o Iehova i na kanaka i ko lakou nui, a pahaneri hou aku; a e ike aku hoi na maka o kuu haku o ke alii ia mea; i aha hoi e makemake nei ko'u haku ke alii ia mea?
- ⁴ Aka, ua ikaika aku ka olelo a ke alii maluna o ka loaba, a i ka poe lunakaua ona, Haele aku la o Ioaba a me na lunakaua mai ke alo aku o ke alii e helu iho i na kanaka o Israela.
- ⁵ Hele aku la lakou ma kela aoao o Ioredane, a kukulu i na halelewa ma Aroera ma ka aoao akau o ke kulanakauhale mawaena konu o ke awawa o Gada, ma ka aoao ma Iazera:
- ⁶ Alaila hele aku la lakou i Gileada, a ma ka aina i Tahetima-hodesi; a hele aku la hoi lakou i Daniaana, a poai ae la a hiki aku i Zidona.
- ⁷ Hiki aku la lakou i ka pakaua paa i Turo, a i na kulanakauhale o ka Hivi, a me ka Kanaana: a hele aku la lakou ma ke kukuluhema o ka Iuda ma Beereseba.
- ⁸ A hala na malama eiwa me na la he iwakalua, ua pau ae la ka aina i ke kaaheleia a hoi mai la lakou i Ierusalem.
- ⁹ A haawi aku la o Ioaba i ka huina o ka helu ana i na kanaka, i ke alii: a iloko o ka Israela he ewalu haneri tausani kanaka koa, na mea unuhi i ka pahikaua: a he elima haneri tausani kanaka no ka Iuda.
- ¹⁰ Kui iho la ka naau o Davida ia ia iho, mahope iho o kana helu ana i na kanaka. I aku la Davida ia Iehova, Ua hewa nui au i ka mea a'u i hana iho nei: e Iehova, e lawe aku oe i ka hala o kau kauwa; no ka mea, ua hana lapuwale no wau.

- 11 A ala'e la o Davida i kakahiaka, hiki mai la ka olelo a Iehova i ke kaula io Gada la, i ke Davida kaula, i ka i ana mai,
- 12 E hele oe, e i aku ia Davida, Penei ka Iehova olelo, Ke hoike aku nei au i ekolu mau mea nou; e koho oe ikekahi o ia mau mea, i hana aku ai au ia oe ilaila.
- 13 Hele mai la o Gada io Davida la, a hai mai la ia ia, i mai la, E hiki mai anei na makahiki wi ehiku i kou aina? a e auhee paha oe i ekolu malama imua o kou poe enemi i ko lakou alualu ana mai ia oe? a e hiki mai paha na la ahulau ekolu ma kou aina? E kuka iho oe, a e noonoo iho i ka olelo a'u e hoihoi aku ai i ka mea nana au i hoouna mai nei.
- 14 I aku la o Davida ia Gada, He pilikia nui ko'u: e aho e haule iho kakou ano iloko o na lima o Iehova; no ka mea, he nui kona aloha: aole au e make haule iloko o ka lima o kanaka.
- 15 A hoouna mai la o Iehova i ke ahulau iluna o ka Israela, mai ke kakahiaka a hiki i ka manawa i oleloia'i, a make iho la na kanaka mai Dana a hiki i Beereseba, he kanahiku tausani kanaka.
- 16 I ka wa i o aku ai ka anela i kona lima maluna o Ierusalem, mihi iho la o Iehova no ka poino, i mai la ia i ka anela nana i luku mai i na kanaka, Ua oki; e alia kou lima ano. E ku ana ka anela ma kahi hehi palaoa no Arauna ka Iebusi.
- 17 Olelo aku la o Davida ia Iehova i kona ike ana aku i ka anela nana i luku mai i na kanaka, i aku la, Eia hoi, ua hewa wau, ua hana ino no hoi: aka, o keia poe hipa, heaha la ka lakou i hana aku ai? ke noi aku nei au ia oe, e kauia

mai kou lima maluna o'u, a maluna hoi o ka ohana a ko'u makuakane.

- 18 Hele aku la o Gada io Davida la ia la, i mai la ia ia, E pii aku oe, e kukulu i kuahu no Iehova ma kahi hehi palaoa no Arauna ka Iebusi.
- 19 Pii aku la o Davida ma ka olelo ana a Gada, e like me ka Iehova i kauoha mai ai.
- 20 Nana aku la o Arauna, a ike aku la i ke alii a me kana poe kauwa e hele mai ana io na la. Hele aku la o Arauna iwaho, a kulou iho la imua o ke alii ilalo kona alo i ka honua.
- 21 I aku la o Arauna i ke alii, No ke aha la i hele mai nei kuu haku ke alii i kana kauwa? I mai la o Davida, E kuai me oe i kahi hehi palaoa, i wahi e hana ai i kuahu no Iehova, i hookiia'i ke ahulau mai na kanaka aku.
- 22 I aku la o Arauna ia Davida, E lawe kuu haku ke alii, a e mohai aku e like me kona manao he pono: eia hoi na bipikane i mohai kuni, a me na laau kaa palaoa, a me na mea laau a na bipi i wahie.
- 23 Haawi aku la o Arauna me he alii la ia mau mea a pau i ke alii. I aku la hoi o Arauna i ke alii, E maliu mai hoi o Iehova ia oe.
- 24 I mai la ke alii ia Arauna, Aole pela, oiaio no e kuai aku au me oe, ma ke kumukuai: aole au e kaumaha aku i na mohaikuni ia Iehova i ko'u Akua i ka mea i loaa ia'u ma ke kumukuai ole. A kuai aku la o Davida i kahi hehi palaoa a me na bipikane, i kanalima sekela kala.
- 25 Hana iho la o Davida i kuahu malaila no Iehova, a kaumaha aku la ia i na mohaikuni, a me na mohai hoomalu. A maliu mai la o Iehova

i ka aina, a hookiia iho la ke ahulau mai ka
Iseraela aku.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 11 Nov 2022 from source files
dated 9 Oct 2020

4fde4536-9f74-574b-8404-d9ec34a30cbb